

國朝常州駢體文錄

國朝常州駢體文錄卷第十八目

尙綱堂文三十六首

陽湖劉嗣綰醉甫

重脩單貞女祠碑

重建專諸塔銘

陸紹聞雙白燕堂詩集敘

黃魯山悲秋百詠敘

芙蓉山館九人聯句詩敘

陶然亭餞秋詩敘

姚春木萬里圖敘

錢筠邨遺集敘

許玉年悼亡詞敘

樂閒書屋遺藁敘

與張皋間書

馬一凡  
與顧立方丈書

山中與鮑若洲書

與王秋塍書

荅陳理堂書

荅吳枚庵書

貽友人書

荅吳白菴書

與施雪騷書

與施石樵書

與倪米樓書

荅汪竹海書

荅許蕩舲書

與蔡浣霞書

荅汪小竹書

請瘞古劔啟

謝餽小豬肉啟

謝惠哈密瓜啟

頤園讀書記

龍泉寺記

蔣邨記

城南觴月記

浮眉樓圖記

潘君妻周孺人誄

祭吳季子廟文

祭張皋聞文

國朝常州駢體文錄卷第十八目

國朝常州駢體文錄卷第十八

尙綱堂文

湯湖劉嗣綰醇甫

重脩單貞女祠碑文

貞女康熙初人祠在惠山麓舊植桃數十株士女雲集靈  
應若響歲久祠圯邑人將請於宰而脩之夫清白守節不  
隱無屈曰貞載在祀典有廢必舉也余爲文書之碑俾采  
風者得觀覽焉

猗歟貞女篤生寒門芳扇空谷暉流舊邨采采陔蘭誰謂  
荼苦女子十年嬰兒千古古華山下雙扉對開衣飄神舉  
帳動靈來風吹碧桃雨洗斑竹野鶴不歸山鵲自哭靡笄  
之碑女額之砧西神一片貞珉至今

重脩專諸塔銘

邑之柳巷舊有專諸塔高不及丈築牆圍之歲久牆圯塔  
亦漸壞石幢欹側瓦贅零亂鴟吻穿屋龜趺臥階其築之  
年月邑志缺如也維我吳俗蔚興先賢延陵之讓國碑畱  
十字春申之好客廟食一方君乃生自堂邑遇諸吳市著  
形熊背比力烏獲其言曰屈一人之下伸萬人之上是則  
椒邱決戰河神眇其一目魯陽返戈羲御退其三舍氣不  
能下志不可奪已宮門夾鉞窟室伏甲蕢不舉晉牙能亂  
齊不殊蒼鷹之擊變生乎殿上豈有黃鳥之殉哀臨夫穴  
中迺精應乎天義暴乎野俠骨斯在英風未衰悲石闕之  
長銜願金身之不壞夫荆卿之里酒人悲歌豫讓之橋國  
士流涕況近在此邦厥基已古市卒走拜里巫來會眾將  
鳩工竝請立石魯壁且破吳閭正開東門拭目來伍員江  
上之潮北邙招魂傍要離冢邊之樹銘曰

吳宮火散蘇臺沼沒一旦魚腸千年馬骨亭亭宰堵在室  
中央此都人士觀者如牆靈感響應亦既覲止勇士之生  
禮子之死禮子以拜神鐙不油潛虬夜吐燭子來遊龍光  
妙光對出天表題雁罷秋貫虹猶曉劍冷越水鉤飛吳霜  
願子魂兮來塔之旁

陸紹聞雙白燕堂詩集敘

夫劉綰箸例兼尙遺騷揚雄論詩首先辨志儒者之珍斯  
貴風人之佩勿譏伐木之詠聽之平心如蘭之言飲以醇  
德大雅既邈古懽不存吾友陸子紹聞抱道端居研經寂  
守育焉有本泊然無求叔寶之神自清育長之景亦好用  
能貌世念於姑射接騷心於水僊珠玉脫口韻流江湖宮  
商在身節應風雨焉往者弭懼西泠落騷南浦嗣依親好  
遠涉荆湘懷思不任篇什遂積雙白燕堂集詩若干卷其



作也良朋參差佳日長短里門之暇迺辱過從君以居憂  
情焉無緒東頭之屋待補北邙之山未營雙燕已去感春  
泥之故巢羣鳥欲飛愴秋風於別樹方君輟詠遲我言歡  
因憶曩遊出觀舊製嗟乎池塘憶弟碧艸不春嶺上思親  
白雲何世而況僕關山淪落天海棲遲行卷所經前塵斯  
在歎麻姑之綠鬢傷庾信之青袍冷硯空敲孤鐙欲涕斯  
又神思以之銷魂風懷因而惻愴者哉

黃魯山悲秋百詠敘

夫豐山九鐘氣感者聲應挺賓一石響附者景躍此將隕  
之泣無假雍門之彈已斷之腸不煩河滿之曲維士悲秋  
發言成詠不平之鳴由斯起焉繫其發商飊於齊館騰清  
吹於梁臺江山文藻屈宋傷心軒蓋風流徐陳歎逝至夫  
城笳悽動隴水哀鳴關前鴻雁河梁落日之篇塞外牛羊

敕勒陰山之唱黃榆蔽野紅柳連天冢艸青而霜飛邊沙  
白而月墮秋之悲也一至斯乎黃子魯山實維秋士蓋少  
而張儉亡命王粲辭家近自楚豫遠歷沙漠零愁彌谷積  
恨崩城每當清節含淒蕭晨告悴風煙獨浪關河羈寄凡  
夫秋公思親平原憶弟參軍寄妹蘭成踰婦莫不緘錦帶  
以寫恨奉黃衣而報書以是言悲悲可知已遂乃結響霜  
月流音砧杵艸蟲生遙夜之思落葉召長年之悲用激揚  
平情性匪流連平景物彙而成編厥有百詠夫李白百篇  
徒誇縱酒羅虬百首祇善緣情以茲諭體八哀託端五噫  
采蕭葛以見志申松桂而爲言魚網輕落宜公同好慚子  
下里莫繼茲聲爾

芙蓉山館九人聯句詩敘

歲辛酉夏農部楊蓉裳先生於廐寺得明楊君謙等七人

聯句贈答詩一冊希出處於曩哲緬唱酬於古惟公之同人已付梓已閱數月而周倬雲姚春木汪竹素蔡湘岩均以下第先後出都先生乃招數君偕蔡浣霞儀部許青士華惇園兩孝廉及嗣綰共九人集芙蓉山館仿聯句故事時爲十一月朔日殘雪在地飛霜下檐松寮孤青竹屋一白梁園之簡斯折金谷之筵乃開香山結社擬九人之勝遊淮南畱客援八公之成數通做瑤席煑琉璃五辛雜陳三雅交錯鶴飲甫畢驪歌已申童僕在旁請進子墨主客離位遂相聯吟酒氣成雨呵硯冰而忽流茶聲作濤沸窗紙而逾響或投韓孟之鼎或撥陰何之灰清緒迭引孤懷互投買島索句門外極其推敲陶潛問形室中勞其贈答華燈幢幢不假燭刻寒櫟隱隱如聞盜催漏三下得聯句長律詩一首九人贈答詩共一十八首夫以吾輩落岑共

盟山木相說秋駕將返冬心易孤舊雨今雨流別淚之浪  
浪團雪散雪中離詞之旦旦流水一別浮雲四飛洪喬江  
上知來日之書難高惠夢中恐今生之路斷所賴星河雖  
阻泥雪長畱後者難期無忘斯會云爾

陶然亭餞秋詩敘

北郭雨霽西山翠流重陽旣展坐益離索素秋二七悵清  
節之將歸良朋三五緬雅遊而誰續葛蕭之興已遠松桂  
之招忽來時則九月二十九日同人醵於陶然亭舉餞秋  
之會也賓多於鴻僕健勝鶻霜風送響乃涉平原黃蒿過  
人深不見日數車街尾殷聲若雷沙高成邱途隘入衙如  
是數里方登斯亭同人乃褰衣褰歷階級踞石而坐攀楹  
欲飛風竹疑嘯上干增檐霜楓如醉排入虛牖亭外積水  
半成方唐野禽拍波來弄寒色直視遼廓城陰周遭蘆葦

下偃方作姓雪煙驚一點似棲仙心昏雅滿空疑潑顛墨  
茵席旣薦壺觴遂開折花當籌捉松代塵談謔閒作繼以  
狂歌鶴聲墮地遙鏗宮商雁路界天俯照金碧已而林暉  
漸移秋景將去眾鳥離樹哀鳴裊裊輟腸淒然興盡告返  
落日蒼莽舍車而徒青鞵互鞵烏帽低景鬼火奪路人煙  
失邨破冢連屋當日黃公之壚荒碑臥阡昔年到漑之石  
忽朝忽暮何古何今斯又酒人見而傷懷秋士因而隕涕  
者矣同人曰是會也請有以志之於是諸子賦詩而余爲  
之敘

姚春木萬里圖敘

姚子春木旣罷秋賦將辭春明離筵甫張別酒斯把於時  
煙鶴流響霜鴻叫空吹角聲之曉寒挂鞭景於殘雪迺出  
萬里圖轅屬同人一言爲贈圖凡三十有二各繫贊語但

設標目不假繪事有聲之畫對松風而忽開沒字之碑披  
蘿月而能讀結想於邈樓袞欲仙近自楚越遠逮秦蜀紀  
山川之勝懷溯鄉里之情話吟覽所及彙而爲圖今春木  
之歸也過蠡水入鱸鄉橫雲卷山圓月流渚懷人七松之  
觀弔古五背之城僕如君年遊跡在斯鴻爪猶雪鷗心自  
波永念昔觀徒增勞矧夫行百里者半於九十勞逸之殊  
致也憂萬里者失於尺寸得失之殊效也春木蒞夜光之  
璧鬱朝霞之氣興驚六合情馳八埏長風之願未知所極  
泥蟠之歎良非所期僕齒將衰壯遊已倦五嶽可適禽尙  
之志未償三徑待葺羊求之契罔託此中出處昕夕憂之  
人海波危關河日算行矣春木相見何年生別新知渺縣  
天未請裁數語書之幢端

錢鈞邨遺詩敘

錢君筠邨竹初先生之子也家有素風少無俗韻颺風肺  
月門第溯其清徽讓水廉泉里居表其勝致緬離井邑隨  
宦浙中幼居官舍隱几四明之山長遊壻鄉放船百粵之  
島歲戊申己酉間竹初先生以解組歸里門結念蕭寥崇  
情澹白庾彥寶之山池遊心物外伸長統之田宅樂志閒  
居筠邨克侍晨昏終鮮兄弟家箴是錄客譜勤修應事則  
穆之百面踐言則季布一諾用能慷慨任力綢繆致思湛  
之箸屬之訓安不忌危士行運甓之功勞而待逸當其溫  
衾問夜撰杖娛年潯南陔之膳薄采芳蘭申小山之招載  
賡叢桂其讀書處日分綠山房積書十楹栖塵一榻主或  
坐隱客來臥遊玉唾隨落雜以蕉桐之聲清觴迭陳佐之  
松韭之味閒好音律偶綴詠歌蓋楊綰之述作祕不示人  
殷浩之周旋久寧作我焉夫其偃仰庭廬追隨倫好非必

德行之懿書畱三篋文章之美價敵百緡而僧孺之識仲  
郢風矩斯存文淵之懲季良義方有在彼柳敬禮衣纓結  
習簫溪藻襲展少年徵逐車騎遊獵狗馬浮榮相競清議  
安歸不且得失之殊涂而趣合之異致哉嗚呼可以風矣  
今年夏同客暨陽寓舍一日薄醉邀余散步過劉伶之巷  
渴杜康之橋忽顧景形縱談身世君性故近躁未能好以  
暇也要之以孔明寧靜之語進之以韋簣消搖之風首肯  
余言恍然有得豈知蘇卿一別常負景光張敏三尋遽鄰  
泉路中秋之前二日君歸自東郭見庭蘭作萼忽忽心動  
語家人曰此非佳兆也古藤之讖淮海先知白楊之悲泉  
明早達遂於是夕得病病旬日而逝竹初先生抱西河之  
慟制延陵之情楊雄悼子玄章惜其失傳徐勉喪兒哀詞  
爲之輟筆因檢篋中得詩數千首冀畱遺澤及付諸孤持



以示余悽然殆絕昔竹林之遊向生感舊蒿里之餞杜陵  
述哀而況師友可作竟觀乎九原昏嫁未終長遊乎五嶽  
以余盛好愴子生平弦望甫周山河永邈范式不來感靈  
旗之告夢張融已逝思塵尾以招魂此又淚盡三號而腸  
爲百結者哉

許玉年悼亡詞敘

許子玉年以乙丑三月結褵於吳門之呂氏甫六閱月呂  
孺人卒余適以事道過武林玉年出示悼亡詞若干首纏  
綿騎省之作惻愴子荆之喪擬進達言先成悽咽既復手  
一燈淚熒熒然向余曰此亡妻遺像且請一言玉年故工  
繪葢追寫之以寄其思者也夫以璵玉之清門匹飛瓊之  
望族仙裙百褶駐若雲霞寶扇半規障來星月玉臺啟則  
山雞對舞玳梁溪而海燕交栖女史之箴早書姑恩之曲

方奏宜其婉好永此芳華而乃骨瘦飛龍心驚別鵲常  
倚翠綃易曉紅空吟陌上之花未識西陵之柏桃夭賦  
杏嫁旋殤孺人之幼也卽以孝稱將屆歸寧先期永逝時  
蓋中秋前三日也嗚呼問姑衛水駕松舟而不歸望母齊  
亭別梧宮兮長夜煙消吳市之玉霧卷秦樓之衣路絕人  
天渺難卽矣今者聆廣寒之樂紫府虛圓望清淺之河紅  
牆永隔明明畫字春人雙倚之闌鬱鬱香秋艸重生之  
徑簾旌欲斷屢響難尋蘅蕪懷而不芳芭蕉展而仍結所  
賴遺絃猶畱墮釵可拾唾點長碧脣涂不朱郎原京兆眉  
惜圓開壻異連波腸隨錦斷僕慚無長筆雅善哀情代泣  
瓊瑰如間環佩指曇花之一見歌琪樹而全非七襄機在  
誰挑續命之絲九子螺殘牋表傷心之竭

樂閒書屋遺藁敘

樂閒書屋遺藁者余中表弟虞旭岡作也君少穎悟十歲能屬詩家世珥其華貂才名吐其白鳳年十七舉順天鄉試旋以黃簽處得中書常袞稱職能爲除書張華入官卽典制諾方其紫微夜值紅梨晨校鳳池之筆莫奪龍門之聲獨高然昌黎篋底三書不存正平懷中半刺將滅循其風旨有足觀焉歲王子余自洛中入都契闊歲時重得敘處君雅好客備極游宴一燭未跋八音共調譽王寢於洞簫識高琳於浮磬興來則擊盃能下思入則亭鐘不眠往往以手之作爭捷溫岐嘔心之篇關奇李賀焉時余舅氏方里居君假歸省癸丑春重試禮闈旋復報罷圖市駿而猶索券賣驢而已空一車雞棲盡室鶴望居恆多忽忽不樂顧不以爲意也一夕飲友人所歸寢而復起邀余出庭前步河景於虛檐弔蟲聲於短砌索筆作五言二章中有

冠蓋去如雲落鵲填古巷之句薤歌有樂梁商之懼不終  
橘頌入騷屈子之命將絕蓋不數日而君病病七日而君  
死矣君年三十無子妻若女俱在都下將以某月日奉君  
匱南還夢兒亭遠吳樹連天望夫石高燕山無地招魂廢  
鶴之里墮淚聞鵲之橋素旄出門黃壚何世君之存也曾  
以所爲詩屬余刪定今檢其遺篋合古今體得百餘首爲  
集而錄之成君志也嗚呼蟬蛻將去猶自戀其殘聲蠹魚  
已僊誰復尋其賸字天平何酷此子不使永年生也有涯  
達人安能無慨羅玉樹而長已化瓊瑰而不收夫孝穆酬  
總持之句方寄集中陳思定敬禮之文竟成身後疑君未  
死喪予平生手墨猶新音塵終古可傷也已

與張皋聞書

執別以來旬月軫結追維緒語篤愛良多叔向居晉能知

穢蔑之心士會去秦不忘繞朝之策古抱今情斯眷眷已足下胸臆鳳尾談折鹿角中正克守質文互宣以此鏡別眾流裁成吾黨嵩陽之館匪遙華陰之市將盛都門人海品類尤雜炙手可熱盟心易寒一貴一賤翟公之所榜門勢交量交劉峻之所箸論固已堅我厓岸屏之階庭魯鐸表其高風齊竽除其濫奏矣若乃奇振於獨氣求於同山桂一聲岑砧並色不以榮悴易不以出處殊而六蔽未聞三益罔取終無補乎學問未足語夫性情蒙有惑焉請陳其略昔李斯吳起別派衍於西河力收容區傳薪極於鬼谷太邱之道宜廣河汾之教貴宏若拘守師箴堅持黨議以矛刺盾借筆操戈輸墨攻守交肆譟張高赤異同各爭紕繆南轅而不知北徹東向而不見西牆其惑一也圭臬之樹儒者以之飭躬韋弦之佩風人於焉尚志如徒履製

魯風裳縫唐俗博康成之帶小子夏之冠謂可陳絲葛以  
居功擁皋比而講學則巫俗恆多禹步伶人亦託夔宗婁  
敬褐者之服許議鴻臚王式博士之衣貽譏狗曲徒操僞  
尺終屬虛車其惑二也朱雲之叱張禹朝廷旌其直名汲  
黯之數張湯道路服其公罪今之尙意氣逞談論者攝次  
公之衣使灌夫之酒正平之鼓入座而卽揭安道之琴登  
門而輒碎是則野兕多狂山膏善罵縱無譏於桀犬豈有  
當於堯羊其惑三也言者心之聲也名者實之號也孔璋  
不嫻乎詞賦而謂風同長卿孔昭不耑乎經術而欲名齊  
董相詆訶作者唐突古人自蔽益深自處愈妄方且雕龍  
之辯出入縱橫捫蝨之談陵蠟王霸語道德則關西夫子  
論經濟則江左夷吾其惑四也五噫之作梁鴻欲以悟君  
三良之篇陶潛豈嘗忘世如徒感傷時命悲閔天人口箸

罪言手標謫史而旨不歸於忠愛教顯悖乎溫柔韓非說  
難孤憤無端楊雄反駭離憂安屬其惑五也董子曰先質  
而後文左志而右物故明體正以達用佩實乃能銜華或  
者棄絕學之丹青耀虛名於朱紫魯縞齊紈徒增其文飾  
宋畫吳冶競豔其浮榮則雖刻楮忘年鏤冰費日亦不過  
燕客臧僕鄭人買珠葉公之好似龍何如伯樂之相眞馬  
乎其惑六也若夫山頭射虎李廣能飛帳下聞雞劉琨輒  
舞天下事固有莊論正衿危言動色者矣設使石礪少激  
竿木多頑枚舉則自以爲俳鄱陽則伊其善譚齊纓索笑  
楚寶貢歡賓戲方陳客難繼作雖樂廣之談清耳匡衡之  
說解頤祗足娛人無關勵世是直以儒爲戲安用以禮爲  
羅其惑七也葢源正則流清本堅則末茂友盡忠告之道  
師有觀摩之方朗甫晉卿今之志士從足下遊必不至規

瑱其言鑿枘而行也特質未化氣未純耳矢孺子以取履  
成名王生以結襪養重足下願不能得此於弟子哉以水  
濟水其道將窮以柯伐柯其則不遠循循善誘則吾聖人  
教已僕之過歸不家食吉曩者結習茲焉日除經史而外  
迺涉老莊狂狷之間可居夷惠每喧囂雜處得所鎮定蕭  
寂獨居知所激發治心之要差爲得之敢告足下亦殊不  
願足下之告人也願言之隱我懷如何溽暑昇軀爲道自  
愛

與顧立方丈書

前畱吳門昕夕奉教廣文先生之舍備極平嘯詠蘇州刺  
史之筵亟申其芳宴懷哉懷哉何能已已昨歸自郡城得  
令弟斐瞻赴喪且返矣素旌千里虛幃七尺驚死別於青  
楓悼生靈於玉樹嗚呼僕自辛丑哭學和乙巳哭傅爰今



復哭斐瞻君家昆季間天何忌之深而奪之速也僕竊維  
辟歲獲交羣從依依寒暑垂十餘年談讌未終酒廬當歇  
逝者之慟感咽心脾況姜家大被遠嘆長眠謝池春艸不  
生短夢其在令原能無愴絕惟閣下早衰之質攻苦積瘁  
頭白偏親相依爲命達人觀化敢進區區昨展空齋昔遊  
宛在秋藤落子猶誤蒸聲古苔上階獨尋篆格竹所舊話  
蘭上墜歡覽其遺編悽然泣下學和客死行篋未歸斐瞻  
傳爰均有緒言上期作者雖所志未就亦足自存元方定  
季方之集風流邈然微之臨獻之之喪人琴已寂私心眷  
眷良在於茲感遠存往言之於邑

山中與鮑若洲書

山中十日庭樹報秋離形絕塵曠如自遠董子云儼然獨  
處惟山之意僕始得之矣故人不見城闔致隔警歎猶昨

景光迭新山木說君而不知領雲怕我而誰贈顧此天繪  
惜無畫圖足音窅然使人失盼夫一日之感采葛爲勞千  
秋之思撫松成愴以余多恨能無眷眷山齋雖僻亦足晏  
娛鐘聲上雲檐翠下雨冷泉咽其清夢瘦竹搖其古魂山  
鬼宜笑時來牽蘿野狐工媚乃復拜月一鐙熒然輒墮遐  
想頗望足下能來同之昔人千里相思猶復命駕況僕與  
足下近在咫尺哉樵風載淙朝暮可至幸勿令山中人亭  
琴而久思支筇而長望也

與王秋厓書

寄跡宋中獲交大雅山木載詠蘭綈是佩辱連輿詣竹竝  
馬看花兔走木蘭之祠鹿遊牡丹之院古臺十里舊雨一  
時簡折鄒枚壇傾高李將今方昔良爲多幸別來半載用  
感九秋足下棠陰益解階艸方綠牘下如水琴鳴有風昔

嵇中散有言一行作吏此事遂廢及觀於足下不謂然矣  
僕依都下如帶周南屬者徙居寓園春告暮矣此閒風景  
殊類江鄉然岸柳十圍不解畱客山桃一面卽能笑人耳  
目異觀未識何故宅折而西一水環帶寬可彌畝互以長  
橋橋東有亭闌檻相亞幽鳥隔竹如聞宮商遊魚啖粿不  
辨紅紫雲壑汪安君之故人輒攜一尊來憫日暮淙雲歸  
山止水遶屋頗悟齊物因知樂天倘亦浮沈人海之中跌  
宕風塵之外者哉足下一官辭鄉縣歷年所側聞老屋密  
邇湖莊樵蘇未替風煙猶昔鄰父瓦盆可當歌唱兒時釣  
石行就畫圖仰給衣食栽百株之桑俯役奴僕足千頭之  
橘一一代籌不覺神往夫人方致出谷之慕僕乃爲還山  
之吟不知足下十年以來得幾僕也野人之言附博一笑  
幸勛光彩毋忘德音

荅陳理堂書

前歲觸暑北上接軫千里月涉於野星飯在門辱足下知  
愛爲忘年交長途言笑遂忘勞頓都門日淺歡娛未足文  
戰旣北驪歌遽賦此之別也祖生之鞭共投繞朝之策誰  
贈非特悲離羣泣歧路而已僕車輪生角兩載於茲曳裾  
之歎乃復不免夫僕素念上之冀得尺寸之階以繼堂構  
下亦思竭斗石之才以追作者三十以來遽就殞喪體復  
清羸近耽玄言閒涉梵課卽復玩弄章句如寒蟲一號窮  
鳥三歎所謂自鳴其天也足下學植素豐兼時品節培膏  
希光扶質立幹僊觀之粦瓊千年而不凋甕社之水珠十  
里而猶映他日名山成就倘不在古人後乎容甫之歿聞  
之心慟追憶仲則少雲立方諸君俱曠世才零落若此夫  
僕與足下所識不過十年二十年閒耳而茂陵之稿半佚

人閒玉樓之文遽歸天上王郎弔夢屈子歌巫興盡悲來  
曾是不意然則過此以往知僕與足下又當何如郭古人  
云行樂須及時焉能待來茲揚州煙月之地文士輻輳騎  
鶴隋隄之上走馬蜀岡之顛清遊旣臻逸響斯赴有所述  
造倘寄一二以爲相思之資亦一快也僕比寓公相邸第  
與外城較隔藩韓二君尙未一面端人之友當如舊識耳  
秋高風厲努力自愛願言之懷曷其有極

荅吳枚庵書

甲寅春辱手告知足下主講瀏陽旋以楚境少寧音書不  
嗣足下寄家箋火之外旅食瀟湘之南無官可居乃爲長  
沙之謫無米可乞更值春陵之饑盡室播遷重以身累計  
違鄉國絲歷十年昔景真繫懷於倫好孝穆眷眷於宗室  
傅昌父老之書不忘虛里襄陽耆舊之傳因感山邱況在

羈孤能無動念僕以乙卯之冬銜哀歸里塵事多慮饑驅  
遂迫比發豫章言留鳩茲瀧岡之阡日月未卜輒思買山  
十笏廬墓數椽魚菽以祀先人雞黍以奉吾母敦勗子弟  
弗墜前業周旋鄰里克繼世好所願止此亦復不奢而諄  
臺人居舊產盡蕩魯人之田假而不歸薛公之券積而難  
返坐此怏怏靡有寧日邇之上九日肥遯無不利嗟乎今  
之遯者難乎其肥矣曩者漢上之遊敷衽論心同舟申款  
願言偕隱遐思卜居笑展君圖以盟息壤君好曼聲故多  
逸趣微吟芳艸託興湘波未敢盡其古歡竊欲圖其後會  
迺尺電不留英年飄忽津梁異軌闊隴殊涂水有東西之  
流星有參商之隔昔年遊好歡若平生首路風波幾無歸  
權能不悲哉僕別後得詩可十餘卷頗悔少作痛自改創  
願學植淺劣力苦不逮暇日當錄一本質之足下昔微之

之集待傳於白傅敬禮之文求定於陳思每一念及此心  
忤然則不欲更緩也宋金元三朝詩選鍊精存液可砭俗  
尙梅邨詩注刻竣否本朝詞選尤宜付梓以公諸世近時  
實無善本也固結之私聊復縷縷衡陽雁回有以復我  
貽友人書

足下邗江之樞竊意道出鳩茲當展良覲比奉故人告知  
足下因舉孝廉方正迫於歸里足下名場坐困垂二十年  
倚闥之望未知所慰竊體介母求祿之意冀遂毛生奉檄  
之願足下之心亦良苦矣願進退出處所當三思古者周  
崇六行仁讓同興漢制十科賢良並策朝重端門之典世  
高講幄之風大儒循吏鮮不由此方郡邑之舉也足下當  
固辭不能以曹邴之揚自解於毛遂之薦也且名者實之  
賓也誠使素履有孚嘉遯無悶歸厚之門昔人所旌通德

之里過者猶式如徒以名焉而已季良名流取之以誠子弟公謹才士黜之以懲風俗彼葉公所好之龍騰笑乎公卿羊公不舞之鶴貽嗤乎賓客由來舊矣夫人卽至哲必不能掩已之短以兼人之長人卽至愚亦必不肖棄其所工而用其所拙今足下旣不獲焚棄筆硯刪除詞藻就繩墨之訓務布帛之言去文苑而入儒林舍文章而談道德則必至名實不相符言行不相顧虛車不足以行遠質鼎不足與入廟繫而無用致歉匏瓜華而不實貽譏桂樹若足下者爲麒麟之植邪爲鸚鵡之車邪僕竊爲足下不取也僕學植未成行能無算前望修途茫無所託願以知交之雅聊盡忠告之道薺甘荼苦鑒此區區足下勿濫南郭之吹免貽北山之笑也幸甚

荅吳白葦書



夏初得手教知已赴大庾學舍報書末由君以冷官遠同  
謫宦友朋之念安能置懷大庾地瘠俗顧不薄日與諸生  
循循相處詠歌先王分子夏之小冠奪戴憑之重席功雖  
不廣所學存焉也來書辱以古人相勛自惟學淺知力凡  
弱而當世君子顧欲廁之儒者之列期之風雅之任薄青  
雲以蟬翼之輕嗣日光以螢火之未有以知其難也比來  
每思發篋窮年肆志古籍而塵務攪其外憂思迫其內事  
與願違興與境阻高山之景自崖而輒返前津之逮臨河  
而罔濟夫以知非之歎俟之他日無稱之疾諉之沒世嗟  
何及矣夫僕之蹤跡隨遇所安同好不諒致來譏責足下  
視僕豈墮冥冥之行而逐靡靡之俗者哉和光同塵乃柱  
下之遺訓情恕理遣亦叔寶之微論與物無忤以全吾真  
僕之自處者有在矣足下愛我甚知我渙百僕自離家又

一寒暑兩弟臥病偏親倚閭勢難久客復事奔走足下一  
官匏繫絕意遠行回首昔遊遂如隔世歸雲在望乃厭敬  
亭之山折屨入手興思庾領之驛山川脩阻相見無期情  
多地遐徒增惆悵

與施雪颿書

昨辱枉顧未獲復面足下裘裒古藤之陰流連枯樹之作  
撫景傷懷移晷乃去意致不在古人下也聞子于邁三日  
爲期僕裝載塗明發卽戒饑驅四方不遑朝矣夫僕與足  
下方其少也蕩海夷嶽之概奔雲絕霧之氣謂可以陵轢  
千古橫鶩八極乃至側身天地投足風塵宋人之守恐失  
平寸株之地越客之射竊笑乎五步之外此亦黃鵠之在  
樊籠而良馬之困平鹽車也前見佳章丰格益嚴詞旨益  
曠駁駁乎一窮通均得喪混菀枯於一致等勞逸於齊觀

足下殆以東野之窮爲南華之達者乎仲則詩近爲某明  
府選刻去取失當昔弇山尚書欲梓其遺集久而遂寢則  
亦有幸不幸者存乎其間也足下勉之矣吾人身不並麟  
鳳年不逮龜鶴同羣則牛馬爲曹屏處則麋鹿爲伍乃欲  
持尺寸之管以與百氏爭奇萬族競秀傳薪窮谷割席名  
山此則係乎師友之淵源平生之風義者也今足下之行  
也近不踰錢唐遠不過禹穴而僕也攜采石之酒上清風  
之亭相距千里而近目異領之雲陰姓合乎氣候一江之  
水朝夕通其消息慎河魴之出入閱沙鳥之往來如是而  
已行李在門僕夫載促書此志別不備不宣

與施石樵書

石樵足下日前湖上小住清遊之暇繼以芳宴所苦良覯  
未久離筵頓促在山之泉修林恣其映帶出岫之雲回風

增其悽愴固聚散之蹟異亦勞逸之致殊也與足下別渡  
江而西候潮富春揖秀嚴瀨四山如畫翠滴篷底餐霞說  
魂捉月盪魄獨攜一尊以酬孤景役役昏曉悠悠山川離  
家旣遠鄉夢參錯桐江食魚因思建業之水泥港雪薄忽  
憶石湖之淩炎風扇空渴病乃甚日甘清冷以致破腹一  
夜數起披篷而出時有奇景助我壯觀火雲西流虹月東  
見河漢下映皆成赤岸如是逾月方抵章門解裝以來旬  
日病暑薄事登覽言從江城樓當夕佳閣共秋水西山睡  
起相對如沐此閒賓從連輿若雲亦復仿吹臺之清興追  
河朔之盛事而吳質同遊從者失歡顧雍在側見者不樂  
知我罪我夫復奚言歲月不居茲已秋茸寓齋雨閒牆隙  
新塌四面多樹昨來風聲蛩吟一鐙蟬翳半葉秋士之感  
如何如何以視足下消搖谿山跌宕文酒將冰喻炭安可

同語臨別承以靈石山樵圖屬題僕讀禮以來吟詠久輟  
無以應也他日者爛柯人跡之外伐木鳥聲之中樵唱十  
里隨君往來谿風兩岸送我南北足下倘有意乎前途阻  
脩人事錯失昨非今是其誰知之略布所懷詞不宣備  
與倪米樓書

米樓足下山居一枕離別須臾依遲西湖眷念良友僕於  
斯時效觀化之蒙叟學忘情之太上良不欲以聚散之感  
重傷足下心也僕渡江而後風來打頭富春桐廬畱我旬  
日緬鷁而上水祇尺許十里五里篙師叫絕每遇都邑輒  
有停泊市人一呼不辨雅舄下士大笑如聞蒼蠅同舟之  
人顛倒枕席而僕且柁樓呼風篷底吸月如在湖山勝處  
與足下相往還也江程颺落余月且盡南州一榻聊避炎  
暑閱士千里百不得一輟沐見客動至失歡此間舊雨輓

跡萍散絲絲天涯渺渺鄉井愛波成海情塵比嶽一念自  
縛彌綸兩閒旬月感秋兼得肺病鬱鬱居此如何可言嗟  
乎米糲僕與足下憂患旣同投契亦合僕齒愧長人事多  
感朝則奔走煙墨夜則驅使魂夢側身窗櫺以就月星託  
足屋宇以避風雨思欲爭雄毛角競秀動植窮天地於跬  
步等古今於瞬息百世而下有如足下之知我者哉一枝  
遠借巢居知風蜀阪之馭不叱而將回朝歌之車聞名而  
悔入爲吾輩歌行路難耳足下方爲六月之息毋輕千里  
之役前者之約良非所期秋風已淒行矣自愛

荅汪竹海書

兩月春明歡娛未暢流水之別浮雲不歸昆季出都當及  
秋葺浮湘出粵結夢迢迢前辱來書申之後約出處去就  
此復難言計僕長君一十八歲君猶茂齒僕已衰齡炎方

多燠冬橘能榮朔地苦寒春桑不葉越禽汶貉語豈同年  
屬以鯨憂迫而奔走一颿秋駛昨發吳門擬綴清遊以答  
風日督帥適至旌旗戒途二三地主負弩疾走市人之驚  
乃亂犬吠下士之笑如聞蠅聲遂至敗興攘臂徑過足下  
度之如僕者尙能謝薛衣而易簪纓去漁笛而聽鼓角哉  
足下文章上追秦漢天性伉直尤絕近今顧手弓貴柔操  
弦忌急僕雖不才敢忘獻納吾人榮枯雖判燥溼相關松  
有說柏之心李有代桃之感性情之故非復區區願鑒其  
愚以爲一得瘴鄉攝衛慎保清虛不盡之言領雲在望

荅許謫船書

國門執別暫爾成秋墜雨飄風離愁寸積歡悰致少遂疏  
報書足下少住京華特耽幽素琴有在御之德基無不平  
之心綠壺駐春碧幌延月庶幾古歡洽此同好南歸何日

懷哉懷哉僕居里門僅及旬月飄蕭淮海遊浪儒玄勝賞  
既稀清尊告謝淫淫邑邑思不可任采蘭十步空懷古香  
攀桂一叢眷言高隱消搖之舉竊有遐心昨辭維揚重迫  
家累茅生奉母向子婚男坐是饑驅更靡盬日清秋買櫂  
行指婺州薦蒲星飯折荷露飲訪水識路尋煙知邨柁樓  
歌聲不辨吳越隔岸隱隱和之洞簫憶蘭上之清遊懷蘆  
中之逸侶風雅掠岸霜鴻叫天漁子一吟樵夫再歎憂思  
之來不可說也行次鶯脰先裁魚書明發高齋遇君於夢  
與蔡浣霞書

自發南中風雲錯互離迷之感沈鬱彌稔華思頓彫瑤音  
不嗣清商告節君子維宜曹務多暇定資道勝守默希玄  
采眞養素弗以朱轂厭其青氈竊覽時人妙茲旨趣僕之  
南下江淮告災隄岸摧魂邨墟楚矚負薪塞土迄無成功



湖身浸高河勢倒注豈惟陵谷殆歎變遷溯厥濫觴匪伊  
朝夕舟楫比阻往來始絕勞歌動地呼聲殷天流民播蕩  
未復邦族雁戶遍墊雉羅彌澤生涯無藉坐益窮蹙一囊  
之粟侏儒奉腹三束之薪支離攘臂魯論熱火班書質錢  
古人所嗤我輩不免日昨返里危坐債臺重以親知疊遭  
喪故自惟身世因感天人有悟向子損益之理無改休明  
夷白之行榮辱等視物我兼忘惟在文章未能遽置前者  
得觀述造實飲我心結義淵淡抗情哀上孔氏規其粉麗  
楊子惡其華丹動以言詞見君風骨音塵雖隔結想於茲  
僕五十之年忽焉且至修名不立老復安能吾宗孝標有  
云魂魄一去將同秋艸每省斯言輒爲隕涕而二三知己  
乃復期以遠致之業勛以進取之途謂不祥之金當自踴  
躍不才之木見告夢寐恐不能耳比有浙中之行荻渚蘆

洲秋望致美霜螯獨薦南雁正飛言念故人渺在天末箋  
緝勿曠幸慰翹思

荅汪小竹書

一別清風佳音告慰元淑南下書悉起居自夏徂秋百端  
頽喪握管再四音塵終輟自非親愛誰能諒之足下年均  
終賈才埒班揚十策不窮千言可待珥彤之職諒無忝已  
吾人報稱重賴文章忠愛不存風騷斯薄昔王褒獻頌不  
假洞簫相如納諫豈關綠綺張平子之詞賦能議史裁谷  
子雲之筆札雅規方術惟夫高義可雪虛聲顧於足下能  
無厚望僕自循寡薄分遠浮榮比返征塵重爲形役江淮  
災沴嗣以海氛寓目蒼黃動成浩歎維揚陳迹不無悽戀  
清遊徂謝湖亭杳然密友致稀心神簡寂每欲約趣猶龍  
希風柳下雌黃罔設堅白不鳴釋躁平矜與道休適所得

匙淺滋用而慙焉夫嗣宗不論人過士林獻疑擗川不及人  
非鄉黨貽請況在今時豈能解免然竊見當代自好之士  
厓斥過陂周甫以隋僻致累子幼以狷慙賈禍徒損於已  
無益於人嘗自忖度不願以彼易此也才智既凡迄無奇  
行生平雅意惟在人倫頽仰朋儕周旋骨肉說親信友卽  
又難言志折心摧可爲扼腕足下知我筆之傳載略有未  
盡故特陳之太公循績比鄰何郡足下得假計及秋杪入  
都後約當無遠期所恐苑枯異命出處殊方相見之懼邈  
焉無日劉雲春木天各一涯回憶昔遊追思勝侶逝者朝  
露存者晨星眷望關河悲來橫集惟冀善調玉體以榮令  
名哽咽裁書不能終幅

請瘞古冢啟

某月日余因事出城東見土人鑿地可五六尺許得古棺

一白骨已露黃腸未毀不銘不碣何年何世哀哉古人盡  
於此日于時白楊亂嘯楓葉倒下鬼火出壙如照其歸涂  
神雅繞枝豈逢其舊識余以行路蓋襄裏不能去也昔西  
隴一墓傳爲混沌之氏東岡二棺尊以冥漠之號敬告仁  
里取法往者泊邨而西叢莽彌畝請於隙地爲別冢焉招  
魂無主之宅改卜無名之鄉齊君一丈夫之夢勿銜恨於  
梧耶秦皇五大夫之封將被蔭乎松隴

謝餽小豬肉啟

某史書對校方譌渡豕之文樂府旁搜偶辨呼豨之字何  
來白蹄忽賜黃腔豬不稱荅豕豕竄笑艾昔者召南美其豷  
發遼東慚其再見雖加大蘭之錫未設瓠葉之筵僮肩啖  
我奉斗酒其敢辭豬肝累人酬尺書以爲報

謝惠哈密瓜啟

危星東去苑是仙根淨土西來瓜成佛果伊古瓜州之地  
卽今哈密之區抱黃臺而蔓歸出青門而種遠一騎紅塵  
笑荔枝於唐驛千年紫塞羞蒲桃於漢宮方東賁以逾珍  
儷南皮而更貴碧蒲蓮花同浮玉井文鱗柳葉柳葉魚竝出哈密  
剖銀刀此日蟠桃鳥使須成曼倩之圖他年青李來禽有  
乞右軍之帖

頤園讀書記

頤園者方伯百菊溪先生讀書處也拓地十笏結齋三楹  
遠離市塵略置邱壑仄逕通曰虛廊互雲闌折而西緣以  
花木小屋疑艇浮來江湖危亭補樓飛入屏障主人旣出  
蓬蒿奪門蟲餘悲號鳥爲歎息許子青士避囂其閒遊神  
蕭遼涉覽明瑟得林屋之勝致申槃阿之晤言溪童而外  
惟攜破書石友不來迺對古硯余以暇日巾車來遊時方

窮冬籬落寒色積葉平檻棲塵在梁落印隔世履綦猶新  
竹粉墜空衫袂忽古幽步徐引素衿遂開松吹落落如助  
清吟之聲籐陰盤盤別成奇字之格茶隄四壁蘆簾一重  
寓公致佳日夕棲止鑪煙出戶隨風低高墨雲過窗與石  
凹凸月白而鳥夢長午雨晦則雞棲不晨以茲景光彌觸  
身世煩仰傳舍流連索居眷我同好城隅閒隔杜老茅屋  
難免秋風之歌白傳蕭寺空傳春艸之什良會苦少芳時  
已非古懽不繇清興斯絕請告諸子爲過從焉僕將抽豪  
圖爾主客

龍泉寺記

去宣武坊南二里有龍泉寺焉其地爲下窪子雜市較遠  
灌莽叢雜竹景補屋槐陰借天寺門洞開一絲無地辛酉  
首夏周子倬雲讀書其中時湘岩水天浣香諸子亦移榻

馬余好埜行時一往過癯僧應門面若枯樹古佛臥壁身  
餘壞落歷院數重始達寓室烏團夢於幽棟蟲選言於古  
牆艸蜨出繭黃於野人之衣風蟬上枝綠成秋土之鬢老  
杏一株實可升斗就樹解渴便忘朝饑數子輟讀清談乃  
集說劔動魄吟詩說魂片石之硯皆畱白雲小團之茶可  
代明月自晨入夕加夏成秋英英風露逼人蕭寒離離星  
辰穿樹瑣碎清磬偶發尋聲出門門外古冢累累百數妖  
鳥咒客山魃窺人白楊背風如助吟嘯晞髮散步消搖其  
閒葢至零露沐首始就歸寢也六月徂暑積雨尋丈諸子  
別儼他舍寺爲空焉余以出郭重過其地廢井空碧頽垣  
亂青馳車徑返歸路惶惑驚雅景之墮地悲馬鳴之向天  
葢如舊識者冢中之人可對語者道旁之石而已嗟乎傳  
舍落落誰爲吾廬禪林蕭蕭幾見彼岸乃蜉蝣出穴方閤

夫朝其蠅蛸在戶已勸夫山耶日月幾何雲煙頓改然則我輩身世之感豈獨灑淚平泉傷心梓澤哉爰爲記而志之云爾

### 蔣邨記

蔣子蔣邨居武林北鄉之杉墩去墩七八里許爲蔣邨其宋時故居也道南道北阮氏表其清門灤東灤西杜陵棲其幽舍枌社久徙艸堂遂蕪憶楊子之舊廬望陸家之老屋哦詩之松巖已前代醒酒之石碑成古阡謝公山下空說兩家之墩丁令宅邊無忌子歲之郭於是指墟里以爲號雜樵蘇而寫圖懷舊德遂初志也屬者余客西泠訪蔣邨於湖上之堤青樓屏開斷虹檻落新翠菊水洗眼棲雲盟心展茲雅圖動我遼想夫以蔣邨植學淵海遊神江湖豪情薄霄壯志彌野方且好客投轄畱賓絕纓婢蓄一陂



之魚奴呼四山之橘封竹盈畝敵千戶之侯擁書數楹傲  
百城之主通三千里以置驛給百萬錢而買鄰不獨守澗  
阿承堂構而已若僕者壯不如人饑來驅我碧山樹老白  
社秋荒午橋將廢芳艸爲之生愁丙舍未營長楸於焉隕  
涕思欲結墅東山置田北郭抱漢陰之甕讀范氏之書瓜  
牛半席足供坐眠茅龍一衣與閱寒暑顧可得哉他日者  
逃情耶壑訪舊湖天挂驅越水之陰策杖吳山之側尋鷗  
汎宅與鶴爲鄰松風在琴蘿月入幕願言昔夢重話茲遊  
蓬蒿三逕蔣詡移家之圖叢桂一山劉安招隱之作斯亦  
空谷之希聲幽居之逸緒也已

城南觴月記

壬戌八月既望余客武林同人邀飲於許子穆甫城南之  
書舍華月流采素秋欲波朋簪忘年芳俎薦夕羅列絲竹

比較壺矢濁酒既醉清遊迺臻遶樹之誰多於應門之童  
出牆之螢炳若行夜之燭縱步所至言尋野田杉柳隱隱  
飢鳴互窺荻蘆蕭蕭荒蛤亂吠聲響錯雜景形回惶飛露  
著艸如吹鬼鐙行雲罨樹恍曳仙帔延此幽眺偕登女牆  
譙樓鼓聲畫壁弓景相與拊掌雜之行歌老兵嗚嗚吹角  
以應清獻鶻落狂呼鷹來江岸邪許之聲湖心欸乃之響  
浩浩四起不復能辨月地忽午天河已中星辰高低風露  
升降千家之夢方白半郭之煙自清一笛接曉溪魚不眠  
孤鈴答秋塔鳥先起感急景之超忽循歸途於沈寥夫竟  
夕之話尹班洽其琴尊清夜之遊徐陳忘其軒蓋屬以散  
人追陪勝友離合兩地喧寂一天申鰲鶴之懷遂麋鹿之  
性露帶風衿足娛乎今夕雲裝煙駕豫訂夫來生是則有  
逢氏之樂曠茲古今無懷氏之民同其旦暮者矣是爲記

浮眉樓圖記

郭子頻伽居吳江之分湖湖流遶邨寬徑十里頗黎千頃  
蔚藍幾重遠山窺人時出天際隱隱一髮亭亭雙鬟水僊  
洗妝湘娥對鏡遂於湖上築小樓顏曰浮眉取昌黎詩天  
空浮修眉句也潑眼成翠遊心入玄拓屏四圍綴檻一折  
日夕棲止坐窗可邀鱗次羣簫吹饌百氏踞談灑雪瑤情  
墮煙曲中笛弄風花四飛唾餘塵橫手玉一色每至漁樵  
夕響雁鶩晨鳴綠白縈青之鄉夢紅浴碧之境夙絕塵躅  
消搖仙心飄飄乎儼宏景之三層帙休文之八詠矣若夫  
初日照梁朝霞臨檻伊誰絕世中有長蛾隋隄殿角誇絳  
仙之黛痕蜀肆爐頭看文君之鬢景然而秋江送別暝色  
傳愁孔雀南飛牽牛西望往往錦帶緘恨黃衣奉書笙寒  
雞寒之聲蕭咽鳳臺之吹殘月兩岸唱紅牙之女郎微雲

一山感白頭之佳婿斯則杏梁少婦海燕銜懷荃壁王孫  
宮驚訴怨望青峯而日莫對碧水以年流蓋自吳江遷居  
魏塘且數載矣浣花別業修竹故廬鴻爪常留漚心自蕩  
而僕因君景事振觸浮生稗川無移家之船鹿門虛偕隱  
之約梁鴻宅畔椎髻淒涼范蠡湖邊修眉慘淡吾土洵美  
余情倦芳循覽斯圖三太息已

潘君妻周孺人誄

孺人姓周氏鏡塘周君之長女也生而雙環告夢十資頌  
文授書得自女孫學禮先乎男子玉字之鐫瑄標姊妹琴  
聲之辨弦識君臣謝絮入戶跨南國之新篇周菰滿園話  
北山之故事有閨望焉盡教焉年二十歸同里潘君簡齋  
次子揚烈名族選也方其牽絲離夕奉盥雞晨洗手調湯  
然脂伴讀金釭二等兩景呈妍玉鏡一臺雙波注笑顧潘

素羸弱姑復患痰孺人鹿盧在腸連環結恨遂乃龍飛藥  
店驚宿女牀肺病辭香眉愁卻黛桃當風而骨瘦桂入火  
而心空孺人之病成於此矣歲壬子簡齋牧山左之濱州  
孺人奉姑命隨往官舍藥竈千里香車一肩送歸燕之于  
飛打慈雅而忽散鏡塘憐女之病且篤也與偕行焉濱故  
瀕海踰月始達一拜舅室言依壻鄉晨妝尙嚴夕飯已哽  
斑竹一簣湘娥之景長離白柰數簪織女之喪遽返潘君  
以荀郎之體傷元相之神命短連絲愁長竟輦懷衛水而  
獨寫羨秦樓之竝僊蓋去孺人之卒數月耳鏡塘旣悼弱  
息兼傷佳壻雲抱日而不曉玉生煙而已寒潘郎集在蚤  
寡鵠之篇以齊女魂歸并哀蟬之曲斷景堂開而夢入秋  
墳過而靈來以余雅託世好述其哀思授我金荃微之形  
管嗚呼錦瑟之年隔世紅簫之地誰家青陵夾蜨應齊思

予之臺香冢鴛鴦免立望夫之石乃爲之誄曰

舜華辭芳澤蘭表悴掌珠不還抱玉而碎緊歟淑姬令德  
來佩女行書箴師儀設帨二十而嫁言歸於潛織素匹左  
題紅薄韓眉圖葉借書格花看何期射雉遽兆離鸞展如  
之媛扶病而語蘭息一絲藥煙半縷見舅從姑呼耶送女  
之子于歸涕零如雨繫山之左實海之濱六月徂暑于等  
不春玉臺拜月金谷步塵傷哉新婦忽此陳人夫以喪歸  
故山返葬曾不踰時英英彫喪魯市迎哀齊亭虛望佳婦  
佳兒夜臺隨唱倚嗟女士儷爾千秋嬰兒瑱儼幼婦碑畱  
光光員石鬱鬱長楸輝茲懿行勿閔山耶

祭吳季子廟文

昔牛斗下燭之墟江漢遠濯之地習僻陋而斷髮蒙榛在  
以棲身千人成都三讓宅國至德所被迄無能名繼自澹

臺遠遊江上沈璧言偃成學里中間歌采風荆蠻推本鄒  
魯而其篤產世族流輝邦邑繫我季子實稱先賢雖吳改  
州來之封漢易延陵之號而故邑尙在高風莫替祀典所  
舉久而成神則吾邑季子廟所由來也維神系出姬氏明  
德之後有人生於春秋世祿之家由禮不墜先人采藥之  
志岡希弱弟翦桐之風上紹孤竹爲百世之師近附子臧  
守千古之節匪弁髦乎君國迺脫屣乎富貴吳俗好鬪時  
方戰爭致師乎雞澤卻敵乎誰岸舉姑蔑之旗奪餘皇之  
舟以致巢隕諸樊闔戕戴吳勇登於堂死暴於野獨能休  
養禮讓光昭文明貴貴賢賢教洽風俗古之人歟蹈德而  
履善廉頑而立懦者矣或者曰禍楚者申也亂衛者郢也  
魯位攝隱徒聞廢嫡之嫌宋祧傳殤轉失知人之哲若夫  
難兄難弟與子與賢奄有吳土聿興周道振西離之鐘鼓

再見衣冠偃南國之旌旗無煩荼火計不出此而篡竊一家滅亡二世厲階所在何說之辭抑知楚風不競天道潛移吳沼將成地靈亦洩祈死得死禍福之無常其爲而爲廢興之有主金玦偏衣城濮將興之兆當璧壓紐乾溪不復之徵鄭憂蔓艸叔段終亡晉衍椒聊成師迺大以云人事夫豈然哉或又謂人臣必誅其將君子貴防其豫號牛召亂恃有後圖乳虎滅宗不無先見公子光者其事類商臣而跡同夫槩也久矣夫異念已萌陰謀早蓄履霜冰至貫日虹成三士縱殺以二桃兩君終遺夫一矢宋襄以愛兄者守國功讓子魚衛成以疑弟者還宮罪歸歡犬骨月之際益難言之況爲虺弗摧困獸猶鬪苟息不能消里克之罾管仲不能弭豎刁之亂抑又何也或又謂返不討賊良史所書義可滅親純臣無愧當日者奉使全身還朝免



難徒有枕尸之歎不聞跣足之呼君目未瞑復讐之志已  
虛臣罪當誅討逆之風安在則豈知靖國敗國爲賈之深  
心喪君有君節甥之權術蓋入宮瞽罪則內援已孤赴敵  
乞師則外患將至彼晏嬰無助而端委立於門葉公有爲  
而免胄入於國者豈非緩急異時難易殊勢邪或又謂天  
地清寧巢由不妨避世家國軌軌園綺且當入朝乃始則  
棄室而耕旣則復命而退終身不入秦越視焉抑亦甚矣  
嗟乎履衛土而食衛粟子鱄所以盟心鞭楚墓而處楚宮  
申胥所爲痛哭何身何世吾相吾君來還唁野愁聽鵲鵲  
之謠去已達山厭聒蟪蛄之耳則其冥情理亂遁迹郊虛  
四海安歸一邱可老而豈忘燕幕之危戀菟裘之樂者乎  
且知遠而略近者非智也察彼而昧此者非哲也以彼理  
炳先幾望推達識早知夫魚腸鱓始烏喙圖終虎踞池邊

鹿遊臺下痛諸兄之無祿憂吾宗之不祀幾幾乎鬼謀曹  
社神降莘虛虞臘將終魯郊已改許遷而思大嶽蓼滅而  
悼庭堅則又陳完易姓常存虞代之韶王子投荒獨抱湯  
孫之器者矣廟之落成也爲乾隆五十五年之某月日殿  
約百步廊餘十弓旣丹其楹亦聖其室此邦人士雲集響  
應將於是觀禮樂焉絲竹之奏如聞乎壁中俎豆之陳兼  
實乎庭下昔者壽夢之鼎已入魯封閭閻之鼓旋徙越國  
吳鴻扈稽之鈞淪精大水干將莫邪之冶遺跡空山維神  
英風如生廟貌斯煥坐帳猶昔棲衣不塵慶忌墮幘無其  
飄揚夫差請冠遜此婉好敬升馨香虔遂瞻拜福我里士  
光茲人文嗚呼死者可作問趙文叔譽之誰歸靈兮有知  
配太伯仲雝而來饗

祭張皋閭文

乙丑春余客京師重寓東城之心太平盦臬聞張君故居  
也禮朋友之死宿艸不哭時距君沒蓋三年矣竚慨虛室  
邇哀泉路情不能制敬爲文而祭之辭曰嗚呼惟命不齊  
惟道無假英英夫子篤生蓋寡學刪父彖功崇騷雅清文  
式靡淵質辭野登朝簪筆實國之光經折五鹿函開九羊  
離容華館消搖廣場處和不偶在默能詳義切雲漢志棲  
煙霧高風翥鶴勝情翹鷺側愴倫好綢繆親故酒德貽清  
琴歌約素屋梁春月君牀對眠秋風首路君兆已遷庭飄  
臺帙壁網塵箋重來幾載遠別千年維茲友生在昔晏語  
翻若墜葉颯如寒雨景堂魂下空帷靈舉鬱夢松阿蕭神  
蘭宇入子東窗開子西軒空悲鵬止尙想鴻鸞鄉流鄭學  
豕表揚言臨風軫素曷禁潺湲嗚呼哀哉

國朝常州駢體文錄卷第十八

國朝常州駢體文錄卷第十九目

萬善花室文上十三首

陽湖方履齋彥聞著籍大興

網山賦

并敘

擬庾子山蕩子賦

傷友人賦

別知己賦

感役賦

簞賦

古藤賦

塗山大禹廟碑

嵩山啟母廟碑

李氏三忠家廟碑

立魚峰贊

歐陽文忠公畫象贊

鄧完白先生隸書贊

國朝常州駢體文錄卷第十九目

國朝常州駢體文錄卷第十九

萬善花室文上

陽湖方履篔簹間箸籍大興

網山賦

并敘

夫昧泉之扁不能以陽熾燭者眞宅之闕蘊也穹谷之杳不能以崇墉掩者坤靈之毓采也故隨堵駢羅名佚其五蓬萊嶙峋迹外乎九有能之偉通夢域於華胥夸娥之精運王屋於海尾是知幽峽者非人力所營而人能達之冥搜者非神功所助而神亦啟之蓋玉堂石室之華珣岑珠岫之奇五丁與千夫爭勞巨鼈與孱庶比烈矣柳城縣東南五里有網山者亦遐區之異岑也涉顛有荆榛之阻撫踵有虺蜥之虞訕訕洄洄歷百紀于隱隱沈沈莫之或覩邑士某者緣山爲宅夜分而寐爽與神遇命其鑿九泥豁

層岫勤而不屈維余能佐某卽信之逝告鄉閭斂錢命眾具畚施鑄曾未浹旬訇然遂闢石穴倒峙盎若覆羅溫泉環咽斜以徑腹雲骨霞髓剜鏤識其仙才金液瑤漿呼吸通其靈氣倬詭旣見四方奔走飾瞿曇於寶陰假纓絡於叢溷縣穿旁達岵嶸纏連有條不紊若網在綱指象攷名命曰網山時實嘉慶十五年庚午之秋也逾三載大人收於茲土僕自京師來趨定省覽南極之川原問朱垠之坻嶸躑步中臬款睇勝域會得茲麓心焉賞之港洞上隙瀑乳下垂坦慮忘遐鉤奇選儔列裊藉卉畱連終暑鄉先生何君澹溪揚觶於前曰逸躅臨而翠微說高輶邁而芳杜恥不獨徭流覽之娛耀棲遲之美也將使桂壁受榮於嘉藻丹邱標目於君子今山之始翕終旣久錮乍披波涌鏡吐曾不幾時而吾子振綺靈蛇之珠奮翰雕龍之采涉湘



度嶠惠然戾止豈蠢蠢者有所翹歟或磴磴而展其儀歟  
騁妍寫妙請子賦之乃爲之賦曰

迺余懷之銳發兮薄九皋而迴翔縹緲聞風於中區兮跂崑  
崙而稅華陽鶩桂軫以採疑兮夕余濟乎江湖琨阜絲而  
宮別兮稟芝田與蘭唐蒼山之陰象林之左丹水出其積  
火井熒其堞野莽置而無垠兮塋潮迤而弗勝洵乾坤之  
祕壤兮超紆譎之塵瑣爰有山焉隱魄榮威諗祥靈祇頌  
職萃夔爾其山之爲狀則嶄巖嵬魄駁駁盤紆匿穎蔽珍  
環落密塗鼓崆峒而連卷兮鞠岷峨而灌輸鬱律隆崛以  
自岐兮徑輪廣袤洎以崑崙肆翼翼之高下兮允京峙於  
炎隅原隰衍於陸海兮參紛互以交錯秀禾平碧億頃兮  
亾屑塵之潛躍蹇朝步以駘蕩兮互望巒岑而眇薄忽背  
隴而徐頰兮靈關覲首而閎廓迺亟趨以愉意兮驚曩觀

之仍橐容山閭之貽我兮循杳嶂以審夫重鑰蓋自遙自  
邇一直一枉時尙奄息而未轅兮徒徙倚而恟恍孰鴻構  
此絕游兮亦奚疑夫山之網也於是倒廡空濱厝窟拂翠  
羽披石髮剗鑿滅痕漱蕩騰沫霅然飄怒對然雲凸排晻  
曖之森森兮迫寥寂而屢蹶天扉呀以降闡兮鬼脇貫以  
迷眞庠窳巧老其相轆轤兮綖衍裂而爲皺皺百笏以玲  
瓏而上達兮釐寸銖以纏積而脩綸左右覩以驟轉兮惚  
不察其逡巡爾乃擘其領緒揆其端倪被藉級而曲引兮  
檻登蹕而獨躋則有飛蚪停鳳偃仰而爭矚渤菡萏之精  
英兮石瀑沓淪而散丹黃佳乳馥馥以垂注兮寫吐氛之  
虹霓溜倒茄之滲漣兮若瓊柯彫錯以瑩乎初日之梯路  
不周以彌涉兮又踞蹠攢仄而植宇度徑庭之倏延兮焚  
閭闔其承附彼椒冢之萬仞兮陽離胡所施其嫗煦神樞

運於太虛兮嘖涌陵出乎巖竇泄玄關而叩紫府日母鍊  
其貞明兮素娥嗣其光晷火齊墜於朴歸兮覆孟脫而不  
盈咫尺朝既炯晃於珩壁兮茸方激射於璣藥羌誰悟此胚  
渾兮薦閭闔而擅倏僞鳴籟緣雷而振宕兮雄風四戰於  
屹嶠之尾泗磬浮以琤琮兮球鍾合以鏗鉦水龍婉以荅  
響兮春鶯翫以諧音繼復蕭騷咲胖而相失兮碩碩磴磴  
鉤以長吟渝吩汎輶輶以旁嘶兮疾霆破錐於窮陰使不  
懣者將震而柱謁兮遑論夫惴慄恐慄者之謫膽而駭心  
覃桐柏之眞館兮挹八玉而御五煙躡安期之赤舄兮禁  
秦皇之玳鞭神人舉景鉅鹿兮玉女散轡於天淵儲沆瀣  
之英兮產芝髓之妍夕盱雲韶之樂兮晨誦奏夫靈文之  
篇瑱琤璀璨其佩綬兮繽紛絡驛其緇駟成叢集於厓隙  
兮疏煩想以錄冥筌巨靈自赧其脰掌兮肩吾曾不得儷

其精研嗜蓋臧之已駿兮，假能醺粹卓犖而蔑先也。當春  
則顛旭祛寒巖，和散滯襟花曼鮮。芬艸羣砌爛乎若，亂錦  
費繡駕飛梁於霄際。時禽習習而將翱，蟄獸颺颺而奔蹇。  
洊雷假道於岐達，豐隆孕形於林裔。故能茁膚寸澤，嘉稔  
浹春霖之藎敷兮。錫沛然之休，瑞入夏則龍從森鬱，檀樂  
潏潏濃翠璘璘，皎色炫晃如湯之沸。所弗臨赫曦之焰，莫  
能往迺臧夫初皇之雪，循蜚之冰嘯寒而淪凍兮。氣淒清  
而曠朗，麾澳忽於炎寰兮。祓燠煖於裸壤，香雨滴瀝於枝  
蔭兮。狀流噴吐而成響，暨秋則絳蛻半捲赤苔始衣勁隼  
止其峒，宿雁巢其岬。調珠露兮桂爲帳，揚野馬兮蘭之帷。  
肅其沈寥，汜豔兮羈客臨眺而思歸。列子御風泠泠兮，武  
夷張樂而停騑。斂皓魄於帖隙兮，鏡圓靈於峰圍。朔管引  
而月小兮，江笳逝而山悲。徂冬則簡積頽，砥澹靖嶮情。

情屬翳默默含宏地脉蒸而難涸兮雖嚴節其莫宣冲暖  
而乘躔兮怙統類於玄英弱蔭聶炕於凋候兮蠕蟲噪噬  
於素商實噤閉之窈窕兮疑重瘖之在空幕溫明於慘黷  
兮韜凝晦之霏霏瀏飈繁韻密率而寘赫兮荅子律於黃  
鍾至若淨泉朝宗清瀆迴瀾雙帶盤盪四絡鉤聯左瀟沅  
右邕川前融江後牂柯懷赤泉揭丹淵瀛澗瀾淪迅復增  
澆亢溜縣制於其實蹊舜浴之豳不庭兮妃帝臺之劭高  
前趨潏潏以瀉瀉而各砰石兮沸褰坂以濯垓埏黃甲紫  
鱗馳波而跳浪兮白荇青藻輶以洄沿俱經乎隘陬之口  
詣乎蹊洿之間其木則有條有梅有柰有楊榆桃梗梧檟  
棣柁柳楚荆牡荆女桑棧桑樸檉文尋條肆合抱松有上  
古之槎柏有千歲之葆桂歷序而粲英枿連理而獻操沙  
杉散枳楓榔枊耶大榕之蒔菴藹於嶠扶疏瑰奇百狀千

名蔓葑攢柯菸邑拏莖重明上鱗狂颺自生抗葉敲朽短  
琮碎瓊榮榮仟仟靡晷克寧其下乃有磨饒鷹鷄孤鸞迅  
雌角端獬胡猊獬豸熊笑人面蜎引仙臂峒象晦奔蠻  
馬晝睡惺惺之侶鬻鬻之倫雨散風歧冤伏陵窘髻髻驚  
蹕又有标目玄狐歷錄素猊踐景噪靴善疑易怪覬山之  
貌疑置擬若若將馬籠而僮束焉莫不踴蹴踟蹰魂滯氣  
懾於洞外其上乃有文鶉采鵲獨鶴羈雌城旦倒縣桑扈  
竊脂孔雀珍氍紛縈斐尾翾翾跂跂頤於斯者裨鑠尤侈  
自邕來翔越人呼之名山鳳皇鳩婦翼赭鸚母鬢霜呢呢  
構厦離紕成行望帝之身咽血哀鳴使人回關悽愴怨游  
而神傷其艸則薜蘿杜蘅王芻藿韭蒨列虎杖并日馬帚  
都管六葉銅鼓單拇蓬茸莛莖蔭藟贊剖夏翼冬蒨晨川  
午蒨曜日熙天不可指叩其上乃有斑斑雉奴雌棘竄蘆

啄飮半夏爰惟鷓鴣蜻蛚晚唳蜩螗夙鳴其下乃爲蜈蚣  
之邑蛇虺之都脩虺碩腹異蟄方顙水蠆爲蛇天螻爲蝥  
橫睛怒喙聲耳鑿齟射工盛賊吞旅士而膳室徒螻螻蛭  
蛭甘我肌膚其果則龍眼益智若榴丹荔柑柚橙橘種以  
十計烏欖茗泛檳榔鹽漬蓬萊仙棗藥日如何栗房蕉實  
棠藜密羅黎朦櫛罽人面羊桃土品莫測峒名殊科罇甘  
咀芳丕繁且多若乃丹砂紫芝黃連青乳款冬決明桔梗  
益母薏苡比穀荳蔻設脯蚺蛇之膽可敵楯弩凡俞跗之  
所稽桐雷之所譜蓋已收一報九摛十得五其石則砥砮  
琅玕嘉氣穹窿絃栗磬磬表樸中金瀨延曜飛仙憩空  
以承露盤續幻芙蓉片片礪齒星星照容其竹則斑厯暈  
螺簋斨琢漆簣簋可箭篠簃中筆歲兩苞捧月百挺節聽  
鳳餘紺化蛇猶碧嶮谷無以詳伶倫安所識徒觀其動植

之萃奧寶臧之蒨絢幹質之潤黠奇贏之仍荐如氈如絲如霖如霰綵繖爛朗葩熾遷變天府之祕璇宮之選竭巧罄奇於此乃見所以煥炳日南作鎮朱縣也舉衡之右故號靈巖者則有龍隱棲霞雉巖立魚劉仙屏風曾公讀書皆以玉筍瑤簪峭立林豎高直化城下竟水府賈其餘勇勒其參伍以角力而闢麗莫不拱雄剡羞括土逼者戴望者俛昔以禹服未之該周譯未之名葛洪屈而不爲標柳生守而不能銘屏悠禩遁荒裔踈踖落拓蔑陳乎海圖虞經徒使狸獠曳腕而登涉矐搖馭舌而肆評山祇享貼鄴之祭澤園聆踏搖之聲則闢秀後於媯補託基邇乎亥算之因也使溯歷以先之則廣成不棲崆峒而黃帝將駕杭於澗水焉王母不築崑崙而穆王將脫驂於湘渙焉孫登去蘇門而訪幽園公避商雒而結軌矣若是之虧替漏濞



者吾固不悵山之虺頽而深悲九京之難起也然而屯於  
泰始蒙於嬪載啟瞶展閔惟我 清代璣祥顯符臻與懿  
會蓋 天子纂神嗣聖洽和永泰羣時受釐肸蠭致禴德  
翔樂砥沛乎無外鵷林鰈海輪琛納貝是以社斗凝其暉  
憬維幹其眞睟精極崇貫珮雕珉嶢岬海汜爲岱遠臣攄  
頸延其臂蕭兮將配黎於蒸薪字嘉禾與黃龍兮數奇木  
與白麟至於蒲塞持教大乘談果借拯溺於無生兮秉慈  
航之慧鑠緝名鷺以飛益兮說禪誦之宴坐徒巢卉以藉  
樹兮剝蔭日而宅火謂行岫之森衍兮成爲擁錫而豁開  
彼羸氓之欽述兮非信心之在我若乃君乎牧乎是邪非  
邪馨誘艸蘭顏若茗華關山之客假夢而夸詎彼頻頻斐  
爾葺加昭光振智神出金沙越士感之勦薄勳奢詭兆或  
允詮理其瑕太人司占敢告無譁於是輦六氣兮游無窮

思遠託兮憺忘歸拂霄嶠兮誰與期良醪醕兮荃獨來揖  
靈僑兮揮羨門遇金女兮卻宓妃陘爲圃兮賓爲圃芝爲  
餐兮瓊爲酌誓解纓兮登帝鄉暢隩區兮倘世宙亂曰馮  
隆之宰宸特鑒兮昉昕而寤列宿揆兮忍俊羨昔產漱醴  
兮運哀窈安眠在原兮崇島織路舞蹲蹲兮神之記遲舛  
南隄兮有卷者阿嶽外垣兮兀巖标疑刊精魄兮益蓋無  
厓永無極兮

擬庾子山蕩子賦

蕩子去國年復年孤征風雨黃河邊游塵逐暗月淒聲隨  
曉烟若夫寒閨春晚遠地秋多雙砧難節單笳未和鶴操  
離曲雉識悲歌銀繩竹箭金的銅荷長樂不樂莫愁易愁  
舊粧素髮新吟白頭夢迎蕙帶魂去蘭舟絲絲怨骨昔昔  
泣眸去日應無遙恨生那知期短復吞聲化石羞餘夢迴

波卻染形落花開奩一寸雨飛絮著牀三日晴乍得河中  
尺鯉書漢南歸信今非虛且展芙蓉匣先籠翡翠襦宿鬟  
加意整歡顏不覺舒相逢驚瘦影偕道往時殊

傷友人賦并敘

僕所友善者有馮志高其人焉野王序裔敬通啟胄高華  
摘雲朗抱襲月故國千里賃伯鸞之春燕臺十年投定遠  
之筆饑迫欲死神頽瘠生孔文舉云憂能傷人殆斯謂矣  
彼穹匪忱景命徂謝幽局長寂歸輒未期卷施之心已抽  
護艸之望誰慰況復弟非曩首門戶何寄婦許秦嘉昏禮  
未迨孤館無可通之夢荒亭有未招之魂傷心之事更何  
可言昔安仁之於楊仲爲賦懷舊文通之念殷孚彌悲知  
已僕旣惜朝露未感宿艸因作斯賦以紀哀云

晨風侵骨悲條鬱林北陸思渺南鴻響沈訔吾友之毀芳

悼遙緒於素心惟此良友鏡華毓萃容與典籍迴拔儕類  
彥輔謝清叔寶慙穢志茂鳳翼遇蹶驥步弱去庭闈遠辱  
親故京國羈人燕雲歸路惟疇年之臬且余遘歸於帝邦  
乃投袂以結言抗執手而不忘眷棲息於一室結縵繆於  
異鄉協旅思之不寐起中夜以彷徨天高月白夜寒鐙侵  
長鋏氣冷短歌聲瘖感北風之惆悵跂東國之徂深解久  
期兮紫玉佩泣橫涕兮丹羅襟余陵岫兮言旋爾糾止兮  
將別策邊艸以促征賦停雲於廣夕誓明河之躑躅怨星  
車之參差勵明德以共勤申麗翰以要之何生平之暫睽  
乃幽明之永歧刈蕙若之春英斷瓊芝之淺蒂嗟銑采而  
未發歎瑤光而終閔彼泉室兮絲昧屏斯人之偉器肆求  
形於宵夢若登叫於帝闈叩九重而不納遺一世其若塵  
顧沴氣之遽結遂芳非之不可因

別知己賦并敘

余以仲春之月久客思返言從京師歸於南邦良朋密侶  
淒別難勝載酒相送匪朝伊夕嗟乎魂靡銷而不長臆初  
陳以何已張衡之思今夕今何夕宋玉之賦非秋而亦秋  
雖無蘇李臨觴之怨而有莊惠解帶之忱涼月欲升脩日  
未落橫咽水於東西緒愁雲於南北曠遠期者人百其感  
黯行塵者或一二其毛哀樂未迫於中年嗚咽乃生於春半  
別之爲累何其永也維時層簾鼓風徑葉晝舞凍煤斲雪  
庭花夕陰尊中之醴清濁已分天上之星參商互見況以  
恨骨易醉迴腸難吐僕之生斯世者積二十有五年矣毀  
齒而爲客卅角而獨行征車聞鐸接夢寐之嚶聲羈舍逢  
人驚眉睫之異色蓋有歲以皆別亦無別而不傷嗚呼百  
年之期倍此者四繼是言別累之以千鄰笛短而宵漏沈

秦聲低而燕歌壯載攀桃李恐損孝章之年折彼瓊枝欲  
問當時之驛若諸君者或以折衝雅範震耀勝流賈生儒  
術甲於此朝相如文詞無出其右而辱斯譴劣隨其末光  
提攜誨導相與成之金石遜其精堅肺附亞其儔匹可謂  
深矣贈言盈篋不無新製之篇去陌牽裳恐墮舊遊之淚  
明月在鏡照其清懷停雲謫梁譜此離曲意有未酬乃爲  
別知己賦一首聊以謝故人之遐心蕩予思之幽魄云爾  
賦曰

伊蒙陋之陳力奉君子之明塵接河漢而輪采效珪璋而  
底身繫蓬姿之寡植雖夙夜而靡申感清惠之不遐披寥  
廓而爲鄰嗟子業之未旣復濡迹以遐邁春陰陰而畏寒  
風颼颼而成噫晤牽袂而永思忽投簪之徒隘日迫夕兮  
何速尊與酒兮助憊惟吾友之逞芳肆令聞於廣居或謀

光於軌躅或振妙於道腴或揮翼而初儀或戢足以自疏  
攬靜芬於跬步忘輝映於坐隅彼頑人之相荅勸余志之  
高騫接腹處之爾遙徵翰墨之我先流晷短而易逝去悰  
促而不還懼休德之孰從傷同心而遽捐於是日光紅兮  
絳花落鵲宵鳴兮烏入幕滯離樹之千尋指層嶺之百巖  
惟初別之俄頃若狂醪之泆鬱迨既別之阻深如疢疾之  
煩懊賦驪歌於此際立斯須而何加感知己之繾綣申余  
情之芳華贈青棠以蠲忿擲瑤瑟以生嗟驚旅魂之不可  
遠兮託軫想於蒹葭

感役賦

假永日以舒眺遣軫結之沈懷覽周原之接盱循節物之  
孔偕柔條鬱以成林薄卉腓而靡涯感候蟲之異喙寓時  
鳥之呼儕嗟余躬之久役失流景之裴回瞻玄燕之來賓

見汀葭之萌秀迺羣類之已周又靡靡而改茂企歲星之  
復旋逾四序而迭奏何征人之永違若浮梗之忘舊嗟豈  
舊之敢忘今亦迢迢而不舍邈雲嶠之前驅今旣吝臧而  
莫予假層陰欲阻予之轡兮薄霧騰於中夜勉忼慨而將  
前兮又依違而相謝彼鳩艸之在原兮羽翼當之而悴傷  
繁鳥懼罹其咎兮爲斷駕於高驤良朋哀其汲汲兮設醴  
酒而饋瓊漿展我情之固騫兮悲不忍於嚴霜墜飄袂以  
下視歷寒炎而改色愁爛漫而流長恨崔隕而山積惟幽  
怨之削肌況鬱思其銷骨思百折而莫窮意萬轉而能析  
犧尊遠而不御瑤琴毀而孰調昵親好於逆旅就執鞭以  
爲僚實隱憂之中蕩髮蓬葆而已焦攬明鏡之末光驚眉  
睫之下撓朝幽并之曠墟夕泰邱之玄壤迫奔睨而跨豫  
對江皋之宿莽彼土矯而情殊亦謹疾之無黨束屣躬而



言寄恐蟻阱之迷惘欲毀方而瓦趨又詆挫而見搶搏九天以不下遂飾繩而措網恆抱景而孤遊意蕭颯而悒悒誓渡湘以遠歸閉閭闔以自廣緬在昔之明哲莫不瘳心於此離矧余情之枯槁徑晦迹而絕羈倚結軫而瞀惑慘玉佩而嚶呻攀薜蘿以蓄慮聊宣列於繁辭

簞賦 并敘

物之美於夏者莫如簞焉動不易時處不違用襍采在室沍然來涼意之所暱感而賦之

萃北陰之崎曲裁千尺之篲管昶寒威於虬枝吟商岫於琳琅惟擷翠而成縷集羣材而流黃抱浮雲之迢遙奉明塵於往夕貴設施之異宜展霜華之凝帝仰左右之薰儀慙丹腴之顏色於是沈陽沸烈溫風泚泚綺疏斂采璣帷欲燼顧蘧蒞之是衡乃絢練而厲情藻披素而自說氣滋

紅而爲馨佇炎洲之如砥豈熙澤之可榮非氤氲之敢違  
固杼柚之含貞潤嬋娟之蕭條駛餘陰於屏几寧容與以  
相從撫波文而無已廁美人之前席託玩賞於足恃祛鬱  
氛於一朝薦流颺於千里佩德音之纏絲寧獻媚於芬華  
效六尺而忘蹙指三秋而有涯甘韜筒以祕采雖捐置而  
無嗟揚纖埃兮終潔怒卷舒以意遐重日舉幽篠兮淥水  
潯拂微瀾兮披子襟幸芳臭之同倚兮時永愜乎素心

古藤賦 并敘

東坡自嶺南歸寄居毘陵顧塘橋孫氏宅卽余家四世寓  
廬也其東楹有紫藤一株傳爲先生手植幹大十圍大矯  
如臥虬屑蔓飛翼蔭庭院百武蓋余猶及倚翫其下至嘉  
慶乙亥厥根朽蠹遂俱傾落所存僅纖條大不盈握而生  
氣猶茂迄今十餘年亦已蒼鬱稠杪本枝徑尺矣自宋至

今幾七百載膏脈未絕爲世珍異洵名德之所馮有神物  
呵護之也庭有嘉樹古人識無忘焉況此藤之奇古託於  
昔賢之手澤又復爲吾家之故物者耶余雖不敏輒爲賦  
之其辭曰

爰有貞卉崔錯陵虛春條旣擢夏榮以舒蒞兩儀之菁采  
絲干禩之榮苓非喬松之是託倚磐石而不渝爾其逸幹  
輪囷孤槎蟠鬱體同青銑色欺蒼玉風梢旣引霜皮暗蹙  
擬潛螭之偃蹇類尺蠖之蜎蠕忽擎攬而欲舉又宛渾而  
自伏雨雪助其豐翳曦陽斂其堅樸若夫紫萼初吐絳蘂  
始繁亭亭高榭猗猗曲欄明霞朝覆珠露夕團羨濃芬之  
菴藹耀舊景之叢駢密葉奉以成幄柔絲纈而爲藩映新  
碧於綺疏舞落英於玳筵惜芳華兮易逝忽荏苒兮歲年  
閼榮寂兮旣久挺茂質兮莫攀產不同於剡溪幸永辭於

翦伐賴君子之末光比甘棠之遺烈謝絕澗之馭蔓殊窮  
崖之萌茁迺委蛇於庭館保蒼蔚之清樾維南陔之雅郡  
有通德之故閭戀桐鄉之惠愛師季彥之僑居翫佳植於  
名賢時徙倚於廣除或移談而就講亦假蔭而陳書洎余  
身而四葉又垂穎兮百載嗟本實之先撥喜紛紜之未改  
念人事之代嬗知化機之是宰何獨鍾於茲幹振芳非於  
硨磲物雖微而有值澤雖遠而不忘彼蒿木之多壽藉明  
德以克章感孤根之荏弱含靈秀兮中臧耿獨立之是懼  
兮恐隕墜於繁霜何所馮以滋且永兮庶仰承夫餘慶撫  
庭柯而太息兮展時序以彷徨

塗山大禹廟碑

夫乾曜奠化庶彙宅躬榛狉兆蒙亭毒嬪起原自驤首靈  
若受圖而秉元龍顙神昆承華而纂辟尊盧赫胥之記謠

明祝誦之躋固已權輿帝象細縑泰壹金鏡朗乎六合王  
券書其十華而運徵蒼昊事遠黎黔必矣荒屯鮮可稽尙  
降暨五德紹駕九招籥和迪迹者上聰宰治者迭聖析縱  
葉而耀翬裳準結繩而鏤螽簡創因開昧茂於黃炎踵麗  
鑠文訖於陶嫫世紘以恢清濁以治然而陽九遘災元二  
履戾平壤震汨崇陵懷襄洪流之堙放勳所不能濟巢窟  
之眾虞韶所不克諧亶惟夏王肇闢昏墊美哉禹功明德  
遠矣粵夫有莘啟哲高密誕祥星精貫昴木之宮石紐叶  
神珠之瑞執威樞之柄玉斗入胃戴經極之珍鉤鈐在首  
錫嘉名於文命奉冥漠於元符觀奇表之所鍾固非常之  
聖也時則息壤用廢滔天未窮九載旣勤弗又其績四嶽  
僉咨乃圯其族白馬傳刑唐廷所以速明效黃熊避策羽  
淵所以顯幽祇禹乃傷前勳之不章懷厥考之成勤於是

應明徵續世業升石夷理寔薄苦身焦思胼爪胝趾酷秘  
 懊咿悄勞繁慮巾挂於道履涉於淵跨巨浸則鼃鼃以爲  
 梁踰翠岑則明叫以爲御行迫徧乎濛汜惟不踐於羽山  
 而後丕烈綴肆遺蠱弭忌使方命之臣配郊於顓頊汨陳  
 之罪奏德於皇天養至渥也報至純也故天下咸知大禹  
 之孝以爲逆瀧之奔非眞宰不靖彝倫之敘非探賾不獲  
 達其變乃能窺天地之臧致其精乃能究通塞之界於是  
 東觀濁河而巨靈獻絲字之箴西至肥水而長人授黑玉  
 之詰乃復案歷中經管求宛委解於陽河厲於衡嶽惟神  
 弗詵再覲始逢蒼水使者銜闕詔而趨迎黃帝巖書獮麓  
 庭而發秘金簡瓊函瑤編銀瑑巡水之源斯備衍瀆之旨  
 具栞苟非智瑩形析合契下鑒者曷以臻此故天下咸知  
 大禹之誠至於沐日浴月疏江浹河家久旅而若忘門習

馳而不入，蘖垂負掌，橈欂乘泥，斬高喬下，鑿於溟滓之墟。  
沙軌山樛泄夫，孫皇之寶，是以濡不給，挖脛不生毛，裸人  
因之而來歸。祖女見之，而太息。辛壬荒度，呱呱者棄懷，庚  
子嚴齋，穎穎者倏夢。故天下咸知大禹之勤，若其治呂梁，  
脩大陸，創充岱底，雍梁則登乎孟門之上，載乎壺口之安。  
南自華陰以滅高阜，東至底柱以疏峻流，截爲九河，奠於  
三門。太史湧而有常，徒駭潛而曲指，於是穿雷夏之澤，決  
滎波之淵，彭蠡震澤之大，以蓄其堙。汝漢濟漯之濱，以滑  
其駛，流沙寫弱水，浮積石，延寒谷，引青泉，丹沼順乎五行。  
赤岸黃支，排乎四海，使鵠首就粒，食之生魚，民返甸服之  
處，共操耒耜，告成賦於中邦，爭息閭閻，得庶土之交，正故  
天下咸仰大禹之功夫，民非食則不育，食非土則不植，所  
以惠莫廣於濟元元，澤莫近於拊饑渴地，紐旣缺二帝謝

平成之基濫觴未脩百王弊廣衍之斥惟能種水豐物爲  
萬世利故天下咸知大禹之仁蓋自有熊問道徒劍履於  
崆峒虞氏陟方攀弓髯於梧野非絕迹之能溯矧寓內之  
未周降至後王或勤外略戴勝虎齒之域穆滿曾游頭痛  
身熱之區漢武初啟未有暢垓埏之廣踰血氣之親毛龍  
在前飛菟屬後順則鳥獸咸若怒則百靈請命桐柏之君  
長稽首而肅兵龍關之華胥褰衣而示卦奇肱三面窮髮  
九津銘之岳瀆之經疏爲山海之記故天下咸欽大禹之  
神且以叢菁之當烈也舉益使治之而距海距川之患刈  
矣以稼穡之宜播也舉稷使務之而艱食鮮食之貺奏矣  
童律狂章之徒制其水怪鴟脾桓胡之魅授之庚辰皋陶  
則拜厥昌言太嶽則羅爲心呂故天下咸知大禹之明由  
是覩土觀地分州殊方聲教所隆要荒是暨暨亥把算二



萬八千餘里大章展極五億十選之步渠搜貢珍毳之裘  
后土錫蹏蹏之獸愆餘相柳羣帝升臺印檢玄都環牧享  
鵬德有及而不治道無納而不徇故天下咸歸大禹之化  
鼓之舞之不軒不翦偉矣哉宣激之綜敘而亶靈之藻瀝  
矣於是鐘山燎祀升中於天陽翟秉圭職成於帝天方申  
其昆命帝亦去其菁華疾風迅雷章於笙箏持衡擁璫調  
於磬虞蟠龍憤信於其臧元龜協吉於先定共遷虞以事  
夏乃猶謙讓而未遑也退處陰河之北陽山之南避嗣於  
商均遜賢於成伯既僉同於朕志始受勅於神宗故天下  
咸知大禹之讓時乃榮光興慶雲集百工相和六府孔脩  
赤文負圖黑風會紀則維貴爵而尙齒先賞而後罰面稽  
天若頒小正之時依永和聲譜大夏之律鉤車綏旃命相  
士以佐任母追深衣禘黃帝以宗鯀朝據饋而趨土夕揮

輅而求言貨幣泐安邑之文金貝鑄歷山之國折額疏狄  
俯袂泣囚三年而百姓以遂焉五年而天下復樸矣然後  
稽時巡之制而大會諸侯於塗山斯時也肇用大輦載乘  
余輪雄虹建旌鳴戴揭幢玄壁若月丹珪如日紛紛回回  
肅肅雍雍羣后齊超靈神竝致十有二州之殖罔不覃懷  
千八百國之臻猶爲枝屬蓋執玉執帛者萬以爲計儼于  
儼冕者日中不遑左應矩而右應繩聲爲律而身爲度瘞  
精糈於名岫羊玉表虔施彫勒於朔宮雞彝瞻潔則有防  
風後至亟徇兩觀之誅屈驚不恭威徙三曾之伐神姦咸  
攝魍魎莫逢是以大陵比享俎豆於馨橋廟同規桑盛胙  
蠶此塗山之崇祀所以閔億載而無替也爾其山之爲狀  
則高衍嵒嶭登降剡施翠嶂疊脩瓊巖迴峙勢峻峭而獨  
宏形沌渾而不鬱用能蒸電流飆膚雲澤稷氣奔蕩於千

里靈汨通乎層霄挽壽春之上流鑠維揚之巨鎮望嚴則  
衡峰遙佐地崇則岱嶽可循爲坤軸之所必爭天輪之所  
必弇原夫山之始也脈聯荆陽湍激淮右軫石完婁於其  
陂狂流滔湧於其際禹乃奮功鑿而洩之刻石確嵬鯀燒  
破析盤渦旣順疏峽就夷故二百十丈控淮之全四十六  
里對荆之阜金樞舊穴昆明之劫灰猶存雪岸浮沙伊關  
之斧痕夜汎林樹森起若黼黻而朝芝蓋英飛得冠裳之  
色是則樂聞截竹奏於禹會之邨粉合珠光拂彼啟母之  
石塗山之盛煥矣如此而或者謂越裳甲楯卽鼎湖龍去  
之鄉蜀路鬱叢亦玉泉負展之地遂疑余山於渝嶺并遷  
神蹟於會稽不知披輿圖者剖古今之分壤考王會者辨  
大小之受其自太原宅都晉陽徙邑壞城平池焚兵散物  
朝端建鼓車右立綏夫五載巡狩有虞氏之制也四方會

朝夏后氏之盛也立天下之中以秉天下之望而諸侯之士不畱於道路藩維之臣咸懷於天威豈復率九陽之辟同問道於巴川舍七表之風獨垂裳於越絕是塗山之可證者一也至於禪封濤霍銘鼎條荆導淮則自壽春而北以合乎渦排泗則由廣陵而東以入乎海游泳譙沛疏鑿崑夔非混混以無稽皆班班之可指豈復先後殊其地而終始易其名是塗山之可證者二也且夫候人待娶實號嘉夷女橋來歸爰妃令德成室台桑之野我造彼昌孕貳輶輶之平度功弗子雖緩狐之說無徵化熊之言亦誕而江淮昏禮尙沿辛甲之辰濠右垵鄉終譜南音之曲是塗山之可證者三也至於剡水遺墟景棧鐘之制山陰故甯傳大計之名禮典本合平省方敷試或隨平駐蹕壇園域樹滋後論之偏疑假葬衣冠歎前王之不復此皆推帝紀

而足馮求夏厯而能算雖少康紹業中興窮髮之鄉句踐  
仍封劍霸文身之俗而黃圖迴別紺谷誰移是塗山之可  
證者四也惟是華殿棲神脩除承享蘭橈奕奕松栢閑閑  
陰映瓊臺陵平清都之上玲瓏石闕幕平泰時之中藻局  
晝閉遠降雲華觚棱夕張來容風后徒觀其枯槎千尺幽  
篁百叢玄霧重陰閭闕生嘯檉癭磊砢而垂乳楓鬼盤拗  
而挈莖複道霓含楯軒霞謫丹柱歛漈飛鳥企乎明堂文  
陛逶迤暗蚪屬乎岡領洵櫟眞之祕館觀上古之形庭然  
而閱歲愈遼庀工漸圯層櫺剝蝕縣棟離披蟲落星枿恐  
毀螺書之什翼頽斗拱遂愆鳳舞之儀何以肅其明禋齋  
嚴報秩懷遠縣知縣孫君讓以嘉慶十八年到官救乏振  
滯脩廢舉墜安養阜成勤恤民隱寶寸陰之訓勿懈厥躬  
懷朽索之箴克愼庶獄歲奉 朝命聿脩祀事陟降在麓

憬焉以思深懼夫聖王頌祇之所弗眷於遐 國家薦歆  
之典將委於地且謂捍淮之衝者莫如塗山弭淮之患者  
莫如大禹迴瀾其人孰迷瓠子之歌高蒞不騫猶據青泥  
之篆惟我 昭代敷文玉鏡協瑞河圖螭珠浮於三州金  
鼎出於二峽守斯土者其可不荅揚休祐用布几筵塗墍  
巍峩鎮茲水府也哉於是選材如雲構梁不日大裒役徒  
親佐畚鍤虛檻咫尺凭其周垣省闔五重駕乎峭壁步武  
依世室之制徑圍遵夾牖之風零陵廟前空鼓琴瑟曲阜  
祠下自闢荆榛安足比此清鏘方斯煜燾大矣美矣輪焉  
與焉蓋經始於某月日落成於某月日鳩功若干計費若  
干禮也然後天儀穆穆廡杖森森貝璵珠閣之飾以賁其  
華茅茨土階之平以返其儉祭則山礪歲祖玉柰金漿旅  
實於庭任土作貢馨香嚴遠昭告維虔謀勒豐珉以誌不

朽乃徵下士俾抒其文履錢化人毗迹蠻服欽忱綴學但  
識夫追蠡探奇欲窺於洞穴竊嘗溯源馬頰乘輦龍門道  
夏陽之邑而搜吉金之遺謁祝融之峰而臥宮碑之下懷  
睿猷之浩浩攢舊甸兮茫茫詡揚易隘贊述難名則惟推  
崇德報功之鉅記維新創造之庥雖敘績於偏隅庶追聲  
於匪頌來瞻聖域闡宣尼無閒之言載鏤巉崖繼子厚畱  
銘之石銘曰

二儀習坎參漏乘乾天水氣蒞人魚道旋湔河覲帝禱麓  
循躋苞庥惟御洪範則詮三仞三沮六沴六事渟瀨以涿  
漣澗以漬蔥嶺派九滄嶼函四陽鳥攸居裸蟲丕被填災  
援沈心瘵形瘠河壇飛錫亥旣奉珠風驚鷁涌水起龍扶  
吾誠不忒疇敢以渝乃作司空平成覆載乃總朕師經營  
華外干羽格苗絲竹感瑞天下爲家酬勳弗逮信彼塗山

維禹甸之爰始導淮激蕩嶮巖中審山脈剖而爲歧伏淪  
恬源通泗會沂磅礴縣流煥爛綺錯海涓東鍵河湄南絡  
登詔藩后述職方岳珮戈董威鉤車效僕遠陳龜壁甫棄  
舟航礪砥砮丹纖縷筐筐靡壤弗臻惟德是翔粉藻灼灼  
磬管鏘鏘脫屣一朝扇薰廣運朔正貿遷蒸嘗迭晉谷峙  
淵和天鈐海潤遺簪九服燔柴千仞荆淮之中宅有幽宮  
翳彼白日颯然神風松楸瑟瑟岡阜濛濛玄武映北紫燕  
朝東荀淑宰懷史晨相魯肅焉如在惕焉恐侮爰究爰度  
式歌式舞沈沈壺奧鬱鬱庭廡斟明水兮椒盤叩蜃窗兮  
揚鑾巫善步兮山址蛟不鳴兮江湍淮有茅兮茅三脊藉  
桂酒兮貢黍稷惟神致禴兮禮樂諧奠淮陽兮鞏 皇國  
刻桷兮丹楹戢庸兮順則引齡兮無極視此兮偉碣

嵩山啟母廟碑



蓋聞玉臺儲祉儼富媪以含囊金燧宣姚合常儀而縣燭  
通維二氣運幽奧之機緘連極四星佐鴻濛之錡鑪爰自  
涓清始判埏埴初宏方寓之內咸歸鼓舞於丹宸圓顙之  
民共戴氤氲於絳闕得一乘乾之主恍若神明握文協廣  
之妃迴殊凡俗是以地精出耀旣仇驤首之皇電繞流光  
乃育兌頤之聖蘿圖雲握變搏土於承匡華渚璇宮孕純  
金於榮澤寄長孺之舍食赤炁而忘饑升姚氏之墟望青  
虹而有象遠稽帝系感生之理宜徵參仰坤輿奇闕之輶  
尤箸至於夏后氏之會紀也胸墨懷璣骨星映斗受巨靈  
之綠字獲溟海之碧圭拯濡溺之魚民宅於豐壤反蕩襄  
之澤國奠以平原振威於顯則萬辟臚誠布令於幽則百  
祇請命童律狂章之侶趨決湍流奇肱窮髮之倫伏膺記  
載聲律身度嶠山表羊壁之虔左矩右繩淮峽建戴橦之

盛鎔紫金以爲鼎克禦神姦披黑玉以呈書莫逢魑魅厥  
縣安邑千秋擅瑰瑋之稱瑞毓姒戎盡室列眞靈之位則  
有羽淵旣入猶祭黃熊石紐曾游遂依赤鼎帝女進五齊  
之醴不廢仙經嗣王隱三載之神永昭德饗凡茲異迹竝  
耀中區至若太室名祠中峰巍號實離明之降祉爲文命  
之中釐徵嬖蘊於初基英爽流於素久當其青泥乍印丹  
栗方馳胼爪胝脰肥水見長人之日察形剝慮緝淵聞祖  
女之嗟恐嘉禮之後時冀令儀之來淑於是吉占五服符  
叶九陽白狐至而慶語成素雁暉而休徵著并乘台桑之  
野我造彼昌褰帷渝嶺之旁隆家應祚江淮昏禮尙沿癸  
甲之期河海程功已促庚辰之令八年春築足未窺門十  
月育賢孩方在抱惟后忘室家之念呱泣無聞惟神播懿  
哲之風訓詞益摯揖殊仁於氣母道變九圍衍靈派於昭

回光榮八遠同心濟阨輔高密之功獨敘勤名蔭鈞臺之  
化靜處而悟幾玄朗稔永繫其天暉達義而執履明勳肩  
襲承其弗祿比之中山帝姬徒貽囂訟之儲湘水神妃未  
協溫恭之嗣宮庭嬉舞竟爲讓國之賓天下謳謠獨戴吾  
君之子雖穹況之攸屬尤慈誨之聿宣量德比軼此焉不  
茂所以楚臣哀怨天問能詳呂覽恢張祕文可錄世本之  
書后趙景耀全敷連山之載女攸微音遑絕曹子建之贊  
美劉夫人之頌思莫不溯積慶於瑤臺詠芳塵於璇室昔  
者陽城陵側羽儀衛鶴蓋之陰巴穴祠中琮幣奉鸞旂之  
綵而輶輶之石舊所馮依嵩嶽之雲時增晦靄翩翻飛雉  
關銘之篆猶存窅窅空桑鴻烈之言無爽考輿地而知顧  
氏之疏誦山經而信景純之博蓋穎芬連理叢生降蹟之  
濱銀榜瓊膏是日棲真之館漢武之千乘方轂就謁隆階

周王之八駿揚鬣來尋宿艸眠明禋於列代知樂顧於茲  
邱若嵩山者固填星之鍾氣乾寶之分支也駸駸爲質堞  
四鎮以開巖崖粵標形立三臺而稱峻石牀銅銚餐朝景  
而入僊庭甘露積霞臥秋廳而驂上馭惟恍惟惚繡衣夢  
太乙之君或往或來紫綬見浮邱之客枕太行而瞰伊闕  
招廣武而揖青城北臨恆碣猶若攢沙南俯荆衡財同覆  
簣日躔流馥金壺有未泐之篇月陸凝馨玉鏡乃長生之  
籍吹笙童子昨乘鸞歸負局先生偶呼鹿駕遙昇閣道遠  
睇層岡多隱霧之羽人琳宮寥廓或御風之姮女貝檻玲  
瓏杖端九節明嬋咽日之鄉錦暈千行玉靖搗絲之處中  
天聖后爲二室之主賓西浦少姨乃一家之眷屬惟神陰  
陽沕穆紫府晨開福祿駢蕃玄都夕映仰企裴回之地定  
邀肝鬲之誠故敢鑿翠危巖染朱崇構公翰秉臬般爾陳

圭蕙楊照雒澗之源珠閣接緱峰之首琉璃挂戶青童至  
而愁攀翡翠籠幃素女窺而不入天容如在穆穆煌煌月  
範凝生洞洞屬屬繡栢百尺似聞鳳管之聲綺柱十圍忽  
現螺書之字芝葉與椒漿並綠竹花共蘭楮齊香乃復遵  
世室之規樹綬旌之制山疊琰笋龍勺雞彝冠裳則袞戟  
牟追飾具則罍鞞瑚簋明水奠於楹左蒲醴酌於豆間縣  
鞞振鐸設五器以歌五聲秉翬執環進九韶而舞九伐貴  
夫賢子一朝之祀典長垂壽母令妻萬紀之尊儀是飭豈  
止成陽黃屋有菟蘆玄礪之祥沆瀣紫壇奏薜荔汀洲之  
曲西陵皇嬭未足比此凝嚴南嶽夫人自然遜其詭麗想  
見殊頑頻浦冥契潛通吹乙巳之蘭芬返紺妃於蓮井列  
甲申之瓊石邀王母於桃池眞侶集而花雨飛幽宴諧而  
祥氛起斯則上求感致託諸蘋藻之微下鑒芬和報以倉

箱之祐閭陽播氣飛沈皆沐其深仁甄曜垂熙毫穉盡歸  
於燾庇敬擇螭腸之石用鐫鳳首之文鉅鹿仲球表清涼  
之壇埤潁川朱寵銘福祀於山隅粉合珠光宛委之圖開  
四壁旗迎春色嬋媛之會接三門乃爲銘曰

中天挺育億類含和瑞圖括象遁甲橫螺絡雲孕雨束岱  
綏河嶠嶠控控矗彼嶠峨其一司眞之駐闕成靈藪三十六

峰洞啟金牖驚舞臨風虬駟載酒貝多瑤艸紛郁陵阜其二

煙霞拱護神宮綺縵明神伊何塗山茂躅白帝倪耦玄圭  
兆續生贊皇綸終膺法籙其三猗猗候人歌發南音壻鄉濠

右嘉夷盜簪叶茲窈窕乃覲辛壬度功弗子內教克任四

比道無競凝暉不測應物撫機自家荆國帝建呱呱長化

母德御龍飛升景命四百五誕辭荒眇云鑿輟陽熊舒幻

迹石剖元良妄闕聖奧恐黷神皇年祺悠邁幽祕莫詳六

備雲散塗實近斯嶠繻黜璵珩眷游雅眺黃庭仙室丹楹

宸廟日新累嘉德優文耀

其七

爰因展禮途接靈居歷祀絲

遐故棟凋疏更安珠敦重開玉虛方依翠壁敬勒丹書

其八

璿匣宵熒晶簾畫捲烟縷繽紛雲衣連蹇鼓名三足案陳

四璉閭闔芳祇鑒臨通顯

其九

中黃素嫵太微少君不言不

辭若往若存碩巾蓮綻羅帶蘭薰左侍右衛煜矣其羣

其十

將子勿譁神弦鏗爾夏聲初夏巫步徐起佩珞鳴璆珉編

彤史薦於聖母式是燕喜

其十一

有齋兮季女藉茅兮三春

蓀脯兮桂酌鵝蘂兮蟾液玉燭調兮物昌金莖潤兮時洽

神載格兮享飴于胥樂兮罔極

其十二

### 李氏三忠家廟碑

原夫三五邇德立黃易象天眷攸寄人謀與同而湯谷填

石冤禽之志未忘廣寓息風孤蓬之心獨轉簣土未覆猶

望灰然餘息暫存甘同瓦裂是則難至節見植躬之所大  
期傾宗殉主烈士之所必蹈奮乎百世何其裨也明兵部  
侍郎肇高廉雷瓊羅巡撫武舟李公秉貞厲之操好綜博  
之學薦名叔世奉檄溟疆君黃持節已聞漢祚之傾道茂  
守官更受湘東之任祇承孱主顛沛偏朝身膺危難則與  
存與亡正色樞庭則不茹不吐迄乎旄鉞電臨樓船鱗  
下裹創疾戰奮臂難支既亡牛渚之軍竟紹汨羅之軌長  
溝之瘠遽化青燐故壘之旌都凝碧血可謂映秋霜而愈  
皎抗夏霆而不辭者矣公弟監軍道我貽公馳聲二陸勵  
志兩虞拭玉藩封枕戈國恥時掩涕於獨臥亟奔命於重  
圍王僧惜之精誠楊仲炎之抗守飲丹矢石之中追爽泉  
臺之側又公從祖江西道監察御史贈副都御史庭實公  
從宦而入交州事君而遷滇海感佩綏之義懷鷹鷂之心



密詔旣頒祕謀驟泄漢獻遘屯沮僞被李傕之禍魏莊畏  
偪辛雄膺高氏之誅慷慨賦詩從容授命蓋三公之歿也  
歲不一稔地亦殊方而腐髮弊齒屹若邱山支解寸斷安  
於莞簟社稷爲重執戈之衛爭先朝廷雖小毀冕之防必  
肅皆得狼曠之死所不負焉援之壯懷求仁得仁蔑以加  
矣當夫勝國祚窮寰區鼎覆高光遺孽輒就纍囚羃曷孤  
輶熬存島嶼黑子之疆日蹙赤符之運全銷異議之臣坐  
炤薪而黷貨擁兵之帥比岬虎以養威江陵可保并無蕭  
簪之君晉陽卽摧尙有長鸞之黨此實朽柱難扶崩城莫  
挽虞淵之日固非天之所能迴尾閭之波亦豈地之所可  
涸兩鐔倚堂之夢舍智士而能占七重圍軫之雲亦羣黎  
所知懼若三公者幾成先見識逾恆流豈忘魚爛之期更  
冀龍興之日而乃崎嶇蕩宇契閭危邦夸父植杖暘死而

未悔愚公荷鍤盡室以相從凶門早鑿鬼錄俱登憤悒而  
履鋌矛談笑而棲鼎俎誠以天經有常臣質無二茫茫日  
月爾氣所充悠悠江河迴瀾欲障陵谷可遷而我心匪石  
風雨如晦而雞鳴不已朱厲附之趨禍勇激人心夙沙釐  
之從君道貫金石雖百身其焉惜縱九死而奚辭嗚呼寒  
霜易零勁艸不植淪胥滄海何地埋憂飄泊東南傷心日  
莫勃蘇頓顙無可泣之秦庭雍門刎首非易驚之越甲木  
鷺初達知君素之已亾玉馬不歸稔微子之未去三百年  
之王氣沈絕苴蘭一二士之英魂散游嶺嶠濟陽昆季之  
壯但紀鄉窳長沙族祖之名惟傳家乘馮弔之倫能勿涕  
洟而興歎哉我 朝振宣名義含宏 聖謨追恤頑民竝  
頒美諡而河陰之難不聞范紹之旌睢陽之封竟無許遠  
之傳得無喋血已往愧受 榮褒毅魄自臧終甘湮沒乎

何以易名四百輩獨闕隴西之宗題墓十八人又改柏臺  
之氏也泯焉不章非所知矣武舟公五世孫慶來愴述家  
風遠承孤裔感年世之速貿冀先烈之常昭甄逢得元稹  
之書欲貽史館卞彬乞任昉之啟未奉朝章乃復亟營崇  
宇竝列三忠敬斲貞珉適垂千祀夷叔單楹蕨水之簠未  
徹武梁畫壁魚腸之劍猶腥鶴歸可識不殊宗會之圖蟲  
篆新刊如見靈旂之耀乃作銘曰

猗歟三公克挺貞毅竝節殊猷營道同義天之所壞固不  
可支唯君是殉否塞何知翟泉窈冥蒼雲晦藹雨溼黃旗  
霰飛青葢易水悲風潯陽落木悽愴孤臣蕭條部曲登陴  
夕嘯墮壘朝呼衣冠不辨城郭爲墟偉哉侍郎自沈止水  
赤綬晨浮丹心夜起申徒憤激正則愁吟駸駸霜露森森  
江潭哲弟監軍致命鋒鏑何處歸元終焉銷骨侍御尊行

橐籥衛君主辱臣死顯忠成仁孰後孰先或推或輓懿鏢  
一門魂招不返人之云亡邦國殄瘁闔箬遺輓 恩隆昭  
代如何純節竟闕潛徽搜采未達守土所遺王經有阡伍  
胥忌號蒼涼鰥鵠無人赴弔還胃愴思世德載揚棲桷俎  
豆以奉蒸嘗令狐舊族奕奕青簡顏公先廟裁裁瑤銑行  
邁霄漢氣補坤乾頑廉懦立孰敢不虔名遜士龍文慙子  
厚鐫頌奇芬庶昭不朽

李公用楫字若濟崇禎十六年進士授瓊州推官明亡  
永明王立於粵擢至兵部侍郎巡撫五府一州順治九  
年 大兵入粵相持敗走自沈於勞氏池中年三十六  
弟來字我貽隨兄瓊州歷官監軍道順治十年肇慶失  
守奉命監李定國軍圖恢復敗死年三十三族祖頌字  
廷實亦偕至廣東歷官江西道監察御史王在安隆受

制於孫可望吳貞毓等謀敕李定國入衛頗預其謀事  
泄被害

立魚峯贊并敘

柳州城南有奇峯焉名曰立魚子厚所謂形如魚之立者  
也飛巖拔天疊嶂委地駁若層鱗疏如健鱗去塵則三里  
而近涉江則一葦可杭蓋未至其下而嶢峴無際疑通仙  
都鬱拂既窮尙接丹氣於是刈荒榛俯翳蒼左塗右谿奪  
虺蛇之徑上磴下曲越魑魅之宮至山之半始覩一洞貫  
洞之中復得兩穴疆石外蟠溼雲內奮竇有鬼斧壁無鳥  
蹤芙蓉葺葢金碧萬殊樛葛爲門絳紫百仞鍾乳斜瀑驚  
赤虹於潛湫流瓊碎階疑落星於中夜謝客登山之作倒  
鑄於陽崖杜公泐名之碑駕峙乎巖缺由是而望遂不可  
梯竹劍之杪續采無名棘刺之端飛靈所集故採祕籥而

莫從怨真宰之有吝也余方羈客遐陬狂搜勝域託情茲  
麓永暢厥觀攀瘴嶺而振衣戴蠻花而自舞孟陽侍宦劍  
閣書銘孫登獨遊蘇門長嘯山中跨鶴蒼梧帝子之魂峽  
裏鳴禽江南逐客之操益遲迴而不返益杳蕩而無盡矣  
迺爲之贊曰

終南石闕昆侖玉堂風泉入壑襍花滿梁巖腹鼇棲峯腰  
龍斷轟然翠柱軼乎金漢珠林投僻桂海幽窮傷爾孤特  
嗟此挺雄水偃怯霜明月墮霧穹蒼何險域中何慕羅谷  
千盤墨天一罅掉景池中聞聲石下琪枝在樹青蓮有臺  
宦官獨往九真未來

歐陽文忠公畫像贊

并敘

乾隆中侍郎裴公曰修奉 命典學安徽隸試滁州得宋  
歐陽公遺像一幀歸獻之朝

高宗純皇帝躬演 睿思親灑 宸翰題其軸首仍賜裘  
氏裘公弗敢私也鉤勒上石而以此卷臧於滁州醉翁亭  
令主僧守之嘉慶二十有二年艸莽小臣有山澤之游假  
道於滁獲覩斯像式名賢之容範圍 天章之煥美慨然  
有動於中日嗚呼遇有盛而未邵道有蘊而必宣何則器  
廣則難充聲積則易永騷裏千里騁之以九同而尙屯扶  
搖一搏陵之於萬仞而不扣故程力以膏時者仁人之達  
願也夸修以聞後者志士之歎衷也而懷才卒無濟美之  
諧覽昔而有不並世之感則誠可嗟矣廬陵先生契聖於  
旣往肩道於將墜粹學入孔顏之室名世應伊周之期雄  
文擇荀揚之精論史軼遷固之躋實峻極所特鍾人倫之  
水鏡也以王佐之英生邳隆之運早擢鼎科遂參名幄出  
典符守入隆台司主上信其忠審天下欽爲碩望揆厥遭

逢不可謂不昌矣然而登龍之譽重則謗毀輒隨批鱗之  
疏上則讒間亦乘楊叔節之執政以直見疏陳仲舉之立  
朝被黨獲罪身歷四君仕逾三黜誣及於牀闥覺逮於宦  
侍又何異夫玄髮之驟改白首之終勞也借使得君有專  
任之權建議無羣邪之沮發嘉謨之洪啓進儒術之冲和  
因百年之盛而革其舛陋綜三代之要而復其典常有宋  
之治雖與先王同風可也而徒以有盡之年流播內外特  
出之才升降終世休烈顯而未宏嘉會不可再邁斯實天  
爲之哉彼用之者亦任其咎而已若我

純皇帝之御宇也九服承鈞七曜遵度殫古先之哲后罔  
克抗仁羅書契之元輔蔑假陳範秩能昵賢庸勳序積炎  
之如日畱之如春至於文思蔚炳瑤簡琳琅著雍勺之歌  
陋射汾之句美未易蒐義鮮由繹卽斯一圖之詠一篇之



麗往復前儒慨念逸軌結韻百言去天三尺昔殷王求鱓  
植之形徒傳夢寐唐宗思戴肩之貌虛若靈風未有拂此  
巾裳榮以藻翰垂素不湮若此之茂者也夫以極天之崇  
撫空存之迹尙爲攬物懷人因容慕德惜良宰之不我臣  
幾欲借才於異代則涵濡之倫委贄於聖世者豈復有  
毛翮之用隱而不呈矇瞍之詞貢而不納如歐公之謙言  
宏說聞於今日功效何可窮數豈僅什百於彼哉尺素之  
摹勞神皇以延佇九重之顧曠列紀而難追雖欲鎔  
金而鑄范蠡染墨而贊宣尼何如俞咈於堂階延澤於來  
禩乎惟聖人不圖近以遺遠惟賢者不枉尺以直尋臣旣  
不敏竊嘗聞斯義矣迺作贊曰

偉矣歐公體道純固金玉其姿鸞皇其度受命自天嘏棐  
宋隆任與志繼用弗我充一縑之貽千載是寶圓祇護持

靈類式耀耀之云何爰觀

聖皇穆穆端儀煌煌

帝章

醴泉之濱滁山之麓昔宴華尊今闕瑤櫝耳白騰聲齒露  
召謗譽毀不期失均皮相丹采閭然有爽其觀抱日稔空  
臨風帶縣虛佇靈素往而曷追明明如月逝者不歸嗟我  
懷人寘彼周行天網欲該威鳳已翔世不歉才士不詭遇  
山中久遲惟君之故龍文何時金冶何成將膏吾輻卒從  
先生

鄧完先生隸書贊

并敘

完白先生四體書俱足絕世而分隸尤美寓奇於平圓巧  
於樸因文以起意信筆以賦形左右不能易其位初終不  
可改其步體方而神圓豪剛而墨柔枯潤相生精微莫測  
有十盪十決之雄兼一觴一詠之樂陳之黼展則貴若球  
刀棲之巖壑則馨踰蘭茝先生自云吾篆不迫陽冰而隸

不減梁鵠夫遜德少溫乃其搗抑比軀孟皇庶爲有徵然  
梁書今所存者惟受禪上尊號孔羨三碑凝重有餘而漢  
人雋逸之神已不可見若先生則孕篆之理萃漢之華萬  
狀千名金聲玉振以今儼古殆猶過之余愛尙獨深師承  
有在悲風微綃之詠斯人已亾落霞浮浦之文明穹所祕  
逸求妙墨縣歷歲時見有臧者或乞覽觀或資摹玩故眞  
翰之獲雖希經目之珍不一每以素緣鈎勒畱其模範而  
吾友李君申耆實有同嗜所蓄尤多搜采偶得輒相臨贈  
今者客游竭遠良執在遙但感索居益荒素業恐夫長康  
廚畫易作飛仙豐城劍氣不光牛斗鸞驚鷹時賞徒溢於  
寸心隸版練褰蹟尙散於寰表暇時追憶諸書分爲之贊  
并記其字數及所藏之處肩吾書品欲永其傳中郎隸勢  
佇思其奧庶幾求遺珠者尙知赤水之津窺積玉者不虛

玄圃之望哉山扇影猶在人間抱犢筆經未歸壤室斲輪  
祕蘊雖非言象所宜縣鵠中衢先爲嚆矢之集就正吾友  
或無譌焉

周易謙卦辭八幅

經文二百九字附傳文二十九字今藏陽湖左氏

萬豪爭赴單穎皆臧貌和神肅體抑氣揚鰭之鍾瑄佩以  
瑤璫座右旣列君子是臧

小字謙卦辭三幅

二百九字今藏懷寧某氏

竹簡久散疑有愁遺神理道謹風格靈琦縣最之內俯仰  
爲儀跬步弗失進於軒墀

詩豳風七月章四幅

三百八十三字今藏懷寧李氏

行疏藻密骨舒緒繁柔桑猗那春日始暄幽人和樂載笑  
載言書亦象之如登周原

堯箴一幅

十七字今藏陽湖李氏

壘塊正骨盤礴大氣霆激電射驚飈走魅哀樂至感百端  
交萃驅遣神筆風雨來會

節書荀子勸學篇四幅

一百四十字今  
藏陽湖李氏

洪海巨浪蛟螭晝舞龍庭欬開斂髻散距直洞九關平迴  
萬弩見此偉力怛焉氣沮

漢章帝詔一冊

八十五字今  
藏懷寧某氏

昆吾劍王發刃流英廉方勁折山立時行筆情不蓄箋力  
能迎心手既暢完如金城

仲長公理樂志論二幅

二百五字今  
藏懷寧某氏

棲奇麗古嵯峨連蹇無意求妍有機可轉斜簪散帶仰睇  
俛眄神仙中人士苴軒冕

節書魏文帝典論一冊

六十一字今  
藏懷寧某氏

金漉秋澂肉芝朝茂神用內充腴色外富畫如綬垂點若

山覆黃初三絕千載重觀

節書曹子建洛神賦一冊百八十六字今藏懷寧某氏

偏裾輟袖作態低昂蜂腰花重蛾繭露黃顛倒偃側皆有

容光引而申之翩然欲翔

節書梁劉嶽傳一幅三十三字今藏大興方氏

開美之度黃流在中軒軒霞舉人倫所宗春林初月秋澗

冷風角巾徐步時聞歸鴻

節書水經注洋水章十二幅一百八十六字今藏懷寧天花庵

嶰谷嶰嶠碧霧蒼鬱我坐其下心如搞本羣真忽至手授

寶錄雲華九會披染靈壑

節書水經注溫水章六幅三百七十五字今藏懷寧楊氏

世角特起偃波迴映絕代姿神目眩心泳青琴出匣紅蕖

臨鏡娟娟新月片雲俱淨

又節書水經注一冊

九十二字今藏陽湖李氏

玄統繡裳雍容中節祛練神明融澡冰雪道勝則肥性高斯潔潤珠在握芳腴自擷

廬山記六幅

百六十八字今藏興縣康氏

上如紐藤下若委薤去墨皆字歸豪必鍛龍舉之韃分此巨派約之扱之勿致靈怪

惠遠法師傳八幅

失首幅存者百一字今藏懷遠地藏禪林

破穎疾入四維已滿斜鋒微帶百情相款蔡君飛白遺迹尤罕素韜冰解妙理嗣續

唐韋續書評十幅

百八十一字今藏陽湖李氏

取徑最直指迷易遵其容磊落其骨嶙峋以柯伐柯賓友古人花雨滿坐不著爾身

唐李文饒文箴一幅

五十六字今藏涇縣包氏

丹萌被澤綠蕊盈階清氣駢蕩足散人懷由彼純詣剛柔  
始諧魯相二石比肩同儕

宋周子太極圖說一冊

二百六十三字  
今藏懷寧某氏

農皇鞭藥成陽之山鳳腦龍脯得之駐顏不如換骨有此  
神丹世無真識不可妄傳

宋程子四箴六幅

百七十七字  
今藏興縣康氏

均如玉律重猶銑挾檢度有常運行相接茗柯實理滋漉  
沾洽華嶽費碑祕境能涉

宋敖器之詩評十幅

四百七十五字  
今藏陽湖李氏

斷山業業縣溜百丈蜿蜒繆戾嶽崎矯抗出幽入顯背馳  
面向煙飛竹舞天地昭曠

明人擬古善哉行六幅

百七十二字  
今藏大興方氏

泥金百城鏤珉千楮奇豔欲奪古香時吐庇其宇下幾忘



寒暑何以易之名都十五

明人駢語一幅

二十八字今藏懷寧天花庵

螺膏盈斛寸管盡慨沈入八幽猛穿七鎧蘿壁日午重陰  
曉暖飛鳥翕翼蚊蟻拄喙

酒經一冊

三百十二字今藏懷寧某氏

方寸含納杼軸胚渾逆鋒平距損益無痕容止韶秀蘭和  
玉溫玄鶴二八集於廊門

自書律詩二章一幅

百十二字今藏懷寧臨江寺

瞿塘急峽舟人爭渡篙沒石鱗將拔復注忽焉疾下千里  
如鶩回難爲奇奪險成趣

國朝常州駢體文錄卷第十九